

JISU KHRISTONI KOTHOMA KAHAM

Kokphuk

1

1 O bayab Thiopil: Chini bisingo asvk vngvi thangmarogno baksa baksa yaphang buchuk svi narvkna naikha. **2** Yaphangni sirni sagbaithang nugui hamthoma pirnairok chvngno salangma haino bohrok svi narvkha. **3** Asvk vngvi thangmarogno yaphangni simi ang phiklai phiskake rutukhutugvi naikha. Abo baino nini thani omorogno mariui svike hamany hvnvi ang kha chongkha. **4** Nvng asvk phvrvngjagmarogni bebak kubuino sai manthung hvnvi ang omono svika.

Baptisma rvnai Johon achainani kok saklajagmani

5 Juidiani bagra Herodni phuru Abiani ochai pirio Sakaria hvnvi ochai khoroksa tongmani. Bini hikni mung Elisabet; bobo haino ochai bosongni bvrvi. **6** Bohrok khorogvino Kaitorni mokolo kahamke tonglaio; Porbuni dagima tei kerongrogno bohrok bebagno rakhogvi tonglaio. **7** Bohrogni bvsa kvrvi, tamni hvnke Elisabet banji. Hai phano bohrok khorogvino belai bos thangka. **8** Sal sa bini pirini bari kvlavi Sakaria noktharo ochaini samung tangvi tongmani. **9** Ochairogni kerong rvksai Porbuni noktharo habvi songpango satrai sognani bo chongjakha. Satrai sogvi tong phuru **10** yang phatarO lukurok parthona khvlai tongo. **11** Aphuru Porbuni suari khoroksa satrai sogma songpangni yagra bvkhak bachai bini bvskango ugjakphaika. **12** Bono nugui Sakaria kirima habvi amang chimang vngkha. **13** Tvmakhe suari bono hai hvnvi saka, "Ta kiridi, Sakaria! Kaitor nini parthona khvnaka. Nihik Elisabet nono bvsa chvlani mvkhang phunuganv. Nvng a bvsano Johon hvnvi phardi. **14** Nvng bsvkse khapang svrangvi tongthogjagno, bo achaima bai buirogbo bsvkse tongthogjagno. **15** Tarnni

hvnke Porbuni mokolo bo kotor vnganv. Bo chuak arak mungsa phano nvnglak. Bohok bisingni simino bo Phola Kvthar bai koboljaganv. **16** Bo Israilni baksa borogno bohrogno Porbu Kaitorni thani kiphilrvi tubuanv. **17** Diari Elia hai bo phan kvplaikhe Kaitorni titun vngvi samung tanglanganv. Bupha bai bvsalano kiphilvi tubui bo bohrogno kvtharvanv; guarrogno bo kahamrogno lamao himnani wansugrvanv; omo haikeno bo Porbuni bagvi bororogno svnamsoganv." **18** Sakaria suarino hai hvnvi saka, "Omo soino hvnvi ang bahai sai mannai? Aug bos vngvi thangka, ani hikbo haino bvrnichvk vngvi thangka." **19** Suari hai hvnvi saphika, "Ang Gabriel, ang Kaitorni bvs kango tongnai. Nini thani o kok kaham sana hvnvi bono ano rohoru. **20** Hake vngna phuru vnganv hvnvi nvng ani kogno poito thanglvya. Abo baino nvng boba khawanv; ang o samani nangphaiya sak nvng kok sai manglak." **21** Yang nasingvi tongnai lukurok tamsvk Sakaria noktharo asvk lervi tongkha hvnvi wanajagvi tongbaikha. **22** Bo phataro ongkhorvi phai phuru bohrogno thani kok sai manphailvya, bo mungsa svk soidom nukhvna hvnvi bohrogbo sai mankha. Kok sai manya vngvi bo bohrogno yak tailkhesse sai tongsio. **23** Noktharo samung tangnani bini bari pavi Sakaria nogo kiphilvi thangka. **24** Aboni ulo bihik Elisabet sagderia vngkha, hake bo nokha tal ba jora nogno kutulvya. **25** Bo hai hvnvi saka, "Asvk balogma ulo Porbu haike ano maia khvlaijakha; lukuni thani ani mvkhang sujakka."

[Jisu achainani kok saklajagmani](#)

26 Elisabet sagderia vngmani nokha tal dok kakhe Kaitor suari Gabrielno Galili angkorni Nasaret hvnvi taun khungchao rohorka. **27** Bo Mariam hvnvi siklajvk khoroksani thani rohorjagmani. Bagra Daud bosongni Josep hvnvi khoroksa bai Mariamno kainani kok svngvi pajak. **28** Suari bono hai hvnvi saphaika, "O talika kahamjvk, nvng hamdi! Porbu nini thani tongo." **29** Suarini kok khvnaui Mariam kvmamvise tongsio; omo tvmani kok hvnvi bo panjalvi wansugui tongkha. **30** Suari bono hai hvnvi saka, "Ta kiridi, Mariam, ICaitor nono maia chakha. **31** Nvng sagderia vngvi bvs chvla masa bawanv. Bono Jisu hvnvi mung phardi. **32** Bo kotor

vnganyv tei Paitorni Sajla hvnjaganv. Bini bosongni Daud haino Kaitor bono bagra svnamanv. **33** Jakobni bosongo bo jonomni bagra vngnai; bini ha thaglak." **34** Mariam suarino hai hvnvi saka, "Kaisa chvla bai phano ang tongyakho, abo bahaike vngnai?" **35** Suari hai hvnvi saphika, "Phola Kvthar nono kobolphaianv phiya Kaitorni bor nini thani kolobphaianv. Abo baino a chvrai kvthar Kaitorni Sajla hvnjaganv. **36** Nini sandai Elisabetno naidi. Bo banji hvnjagvi tongmase, aile asvk bvrnichvgose tabuk nokha tal dokni sagderia vngvi tongkha. **37** Tamni hvnke Kaitorni manya samung mungsa phano kvrvi." **38** Hake Mariam hai hvnvi saka, "Ang Porbuni selengjvk; nvng sama haino ani thani vngthung." Hake a suari thangka.

[Mariam Elisabetno naimani](#)

39 Aboni ulo Mariam Juidani hatai kami bvkhak taun khungchao dolangkha. **40** Bo Sakariani nogo thangvi Elisabetno khulumka hvnvi hvnvika. **41** Mariamni a kogno Elisabet khvnakeno bini bohogni chvrai barsaka. Elisabet Phola Kvthar bai koboljagvi **42** hai hvnvi sotonvi saka, "Bvrvirogni bisingo nvng hamchajak! Nini ogni chvrai hamchajak! **43** Ang sabo, ani Porbuni bumase ano naina ma phaika? **44** Nini khulummani kok khvnakeno ani ogni chvrai tongthogjagvi barsaka. **45** Porbu samani abo nini thani soino nangphaianv hvnvi poito thangma bai nvng hamchajak!"

[Mariamni lobmung](#)

46 Mariam hai hvnvi saka, "Ani khapangle Porbuno kotor hvno, **47** pholale ani tongthogjago, Kaitor ani mvthangnai vngo; **48** tamni hvnke selengjvk kotoino bo najakha. Hake tabukni simi bebak borok ano hamchajak hvnanv; **49** tamni hvnke Kvplaisa Kaitor ani bagvi tangkha samung kotor. Kvthar bini bumung; **50** bono kirinai bebak borogno maia khvlaio piri pirio. **51** Bo yaktvk phan gvnang jangrisaui khitar rohorvi kungchuknairogno sukurugrvo bohrok wamano. **52** Bagra kvplairogni singachon bo keple rvo, phiya kechen kotoirogno kuchugo kasarvo. **53** Ok khuijagrogno chamung kaham bai ok supungo, phiya gvnangrogno yak

buchakhe rohoru. **5455** Chini pirogni thani bo samani, Abraham tei bini bosongno bo omorni maia khvlaina hvnvi joban rvmani, a joban bo pogyai bini seleng Israilno chubajakha." **56** Mariam nokha tal tham katvtvi Elisabet bai tongvi nogo kiphilvi thangka.

Baptisma rvnai Johon achaimani

57 Mol sokphaike Elisabet chvla masa bakha. **58** Porbu bono khairogjakha hvnvi khvnau noksanokari tei sandaimasakrok bo bai baksa tongthogjagbaikha. **59** Sal charni salo a chvraino rakiting khvlaina hvnvi bohrok phaibaika. Buphani bumungno rvksai bohrok bono Sakaria hvnvi pharna naikha **60** Aphu ru buma hai hvnvi saka, "Ihi, bini mung Johonse pharjagnai." **61** Bohrok hai hvnvi saka, "Nini sandaimasakni bisingo khoroksani phano omo tvi mung kvrvi." **62** Aphuruke tamo mung pharna muchung hvnvi bohrok buphano tailkhe svngka. **63** Sakaria svijagnai manvi sanvi hai hvnvi svika, "Bini mung Johon." Abono nugui bohrok bebagno wanajakha. **64** Aphuruno Sakariani bukhuk kiyogphika, bo kok sai manphika. Abo baino Kaitorno bo lobkha. **65** Ganagini tongnairok bebagno kirijaglaikha. Hake o vngmarok Judiani hatai kami brum brum pirjakha. **66** Omono khvnanairok bebagno wanajagvi hai hvnvi salaika, "O chvrai ba ulo tamo jani vnglangno?" Tamni hvnke bini thani Porbuni bor tongo hvnvi bohrok sai mankha.

Sakariani lobmung

67 Johonni bupha Sakaria Phola Kvthar bai kolobjagvi hai hvnvi svkang baira saka, **68** "Israilni Kaitor Porbuno lobdi! Tamni hvnke bini borogno bo naikhlavi phiyogvi rvphaika. **69** Bini seleng Daudni bosongo bo chini bagvi kvplai mvthangnaisa masa bacharvkha. **70** Agi phuru bini diari kvtharrogni khuk tvi bo omono sai kvlangkha. **71** Arirogni yagni tei chvngno naislerog ni yagni phiyogna hvnvi bo kara khvlaika; **72** bini joban kvtharno maitu khvlavi chini pirogno khairogna hvnvi bo saka. **7375** Chvng kirima kvrvikke, bini bvs-kango kvthar sutrangkhe thviya sak bini

samung tangvi manna tvikhe, bo chvngo arirogni yagni phiyogna hvnvi chini. piri Abrahamni thani joban rvi kara khvlaima tongo. **76** Chvlasa, nvng Paitorni diari hvnjag anv; Porbuni lama svnamna bagvi nvng svkang baira thanganv; **77** sumsok nakarjagma bai rangma mananv hvnvi nvng bini bororogno saklaiianv. **78** Tamni hvnke chini Kaitor belai khai rogma gvnang; abo baino bo rarigmani sal chini saka kasarvanv, **79** chvng khakchangni lama himvi manna tvikhe, kvthvini saklom andaro tongnairogno pohor bai bo pilala khvlaihoranv." **80** Chvrai torvilogvi siuinugui phairvrvgo. Israilni thani nugjagnani mol phaiya sak bo hasing panthoro tongvikha.

Jisu achaimani

2

1 A molo Romni bagra kotor Augustos bini hao tongnairogno bumung ma tisabainai hvnvi saklairvkha. **2** Abono puila borok lekhamani. Aphuru Kurinias Siriani ojama. **3** Jani ja bumung tisarvna bagvi asvk borok aphuru jani ja hao thangbaika. **4** Daud bosongni borok Josep. Aboni bagvi bo Galilini Nasaret taunni Daudni kamichang Juidani Bethlehero bumung tisarvna hvnvi thangka. **5** Bini logi Mariam tongo. Svkangno Josep bai Mariamno kainani hvnvi kok svngvi pajak. Mariam aphuru sagderia. **6** Bohrok Bethlehero tong phuru Mariam sak kengtvi.kengtvi. **7** Chvla bvsacha; omono bini svkang bvsacha. Bo a chvraino ri bai dului guai nogni musuk ada charvma manvio mokholvi tonkha; tamni hvnke nograi tongthai nogo jaga kvrvikha.

Mera mrvgnairogno Jisu achaimani kok sajamani

8 A jitolo borok magnvitham panthoro hor horo mera mrvgo. **9** Aphuru Porbuni suari khoroksa bohrogni bvsakango nugjakphaika; Porbuni pohor bai yaksi yagra chvngsacha vngkha. Hake bohrok jaikheni kirijakha. **10** Suari bohrogno hai hvnvi saka, "Ta kiridi, ang norogni bagvi belai

kothoma kaham tubui phaika; norogni simiya, hani bebak borogni bagvi. **11** Tinini horono Daudni kamichang Bethlehero norogni bagvi mvthangnaisa khoroksa achaikha - bono Khristo Porbu. **12** Chvrai masa musuk ada charvma manvio ri bai dului mokholjak nuguianv. Haikeno norok bono sini mananv." **13** Chugnohani teibo suari pal kotorkhe achomsa aro sokphaika. Bohrok Kaitorno lobvi hai hvnvi rvchabkha, **14** "Chugnohani kuchugo Kaitor lojbakthung! Haktoro bini khajama bororok hamtung!" **15** Suarirok bohrok bai kaglai chugnohao thangphika, hake mera mrvvgnairok hai hvnvi salaika, "Himdi tho, chvng Bethlehero thangvi naianv Porbu chvngno salangma hai da vngvi tongkha." **16** Bohrok dakti thangvi Mariam bai Josepno naitugui nukha, a chvrainobo musuk ada charvma manvio mokholjak nuguikha. **17** Nuguikhenobini kogno suari salangma hai mera mrvvgnairok boh rognosai khvnavkha. **18** Bohrok a kogno sai khvnavkhe bebagno wanajagbaikha. **19** Yangbo Mariam a kogrognokha bisingo chobvi narvgui kahamke wansugui tongkha. **20** Suari sama haino mera mrvvgnairok khvnaika nuguikha, aboni bagvi bohrok Kaitorni mungno suritvtvi lobvi kiphilvi thangbaikha.

Jisuni mung pharjagmani

21 Nokha sal charni ulo rakiting phuru chvraini bumung Jisu hvnvi pharjakha. Ogo vngya sinino •Suari bono a bumung rvi kvlangkha.

Jisuno noktharo yapharmani

22 Musini Kerong haino abul sumani sal sokphaika. Mariam bai Josep a chvraino Porbuni thani yaphama hvnvi Jerusalemni noktharo tvlangvi thangka. **23** Tamni hvnke Porbuni Kerongo ahaitongo, "Svkangni bvsa chvlakhe Porbuni thani mayapharnai." **24** Porbuni Kerongo tongmahaino, "Tokblu jorsa ebakhe pharuk bvsa jorsa," bohrok Porbuni mungvi ratharna thangka. **25** Aphuru Jerusalemo Simion hvnvi Kaitorno maninai khoroksa borok kaham tongo. Israil yogmano nainani bagvi bo nasingvi tongo. Phola Kvthar bono kobolvi tongo. **26** Porbu rohorna hvnmani Masiano nugya sak

bo thviglak hvnvi svkangno Phola Kvthar bono sai kvlangkha. **27** Bo Phola Kvthar bai tubujagvi noktharo phaika. Aphuru buma bupha Kerongni dagima hai khvlaina hvnvi Jisuno noktharo tubukha. **28** Simion a chvraino bamsogvi Kaitorno lobvi hai hvnvi saka, **29** "Porbu, nvng kok rvma haino nini ^ selengno khakchang rvi tabuk yakarvi rohorchidi. **30** Nini rangma ang mokol baithang nukha; **31** bebak dophani bororogni bvs-kango nvng abono khvlaika. **32** Abono buini bororogno nini lama phu nug-nani pohor, nini borok Israilrogn chvngsacha khvlainai." **33** Simionni o kok khvnai Jisuni buma bupha wanajakha. **34** Simion bohrogn bor rvi Mariamna hai hvnvi saka, "O chvraini bagvino Israilni baksa ma kvlvknai, baksa ma thangchanai. Bono Kaitor bai thaibol chongvi rohorjagnai; bini bebailo bororok kok sanai, **35** haike bohrogni kha bisingo tamo tong sijaganv. Khao seng yorjagma haike nvng bvkha baijaganv." **36** Aro Hanna hvnvi diarijvk khoroksa tongo. Bo Aser bosongni, Phanuelni bvsajvk. Bo belai bvrvichvk; kajagmani nokha bisi sini ulo bo randi vngkha, **37** aphuruni simi nokha bisi kholpebrvibrvi bo randino vngvi tongkha. Nokthar khibi bo tei kubun phasing kutulya; bo ubaske parthona khvlavi Kaitorno hor sal surimang tongo. **38** Bobo katsvi aphuruno aro sokphavi Kaitorno lobkha, Jerusalemni sal naina hvnvi nasingvi tongnairogn bo o chvraini kogno sai khvnarvi tongkha.

Nasareto kiphilmani

39 Porbuni Kerongo tongma hai khvlaibavi Jisuni buma bupha bohrogni taun, Galilini Nasareto kiphilvi phaika. **40** Chvrai Jisu torvilogvi phairvrvggo, siuinugui khasiui phairvrvggo. Kaitorni bor bono kobolvi tongo.

Noktharo chvrai Jisu

41 Jisuni buma bupha bisi brum brum Yogma Tero Jerusalemo thango. **42** Jisu nokha bisi chignvini chvrai phuru bohrok agini haino Yogma Tero thangka. **43** Abo paikhe bohrok kiphilvi phaika, yangle Jisu nokthar bisingono tongrvkha. **44** Buma bupha abono sai manya, logisongrok baino

tonganv hvnvi tongo. Ulo sal sani lama himbavise bohrok sagni borok tei sinima bororogni bisingo naitugui nailaio. **45** Aro Jisuno naitugui manya vngvi bohrok naitukte naitukte Jerusalemo kiphilvi thangka. **46** Nokha sal thamni ulo bohrok bono noktharo manvikha. Jisuno aro Keronr phvrngnairogni bisingo achugui bohrogni kok khvnai tongmani phiya bohrogno svngphenegvi tongmani nuguikha. **47** Bo samano khvnanairok bini sian kyrvng kogno khvnaui wanajagbaikha. **48** Jisuni buma bupha abono nugui kok sana suda bor manjaglvya. Buma bono hai hvnvi saka, "Sajla, nvng tam vngvi omo hai samung tangkha? Naidi, nvpha bai ang bvsvk biji bijikhe nono ma naitukha." **49** Bo bohrogno hai hvnvi saphika, "Tam vngvi norok ano naituk? Aphani nogo ma tongnai hvnvi norok sai manya da?" **50** Abo tamni kok bohrok sai manlvya. **51** Jisu aphuruke bohrok bai baksa Nasareto kiphilvi phailaika. Bo bohrogni kok baryai tongvi tongkha. O nangvi thangphaimarogno buma thaicha kvrvtvi bvkhao kholvi narvgbaikha. **52** Jisu tormalogma bai khasima bai chakrai phairvrngo. Haitvtvino bo Kaitornibo borognibo khajama vngvi phairvrngo.

Baptisma rvnai Johon pirmani

3

1 Romni bagra kotor Tiberias ha narvgmani nokha bisi chiba ka phuru Pontias Pilat Juidiani ojama. Herod aphuru Galilini bagra, bini takhuk Philipbo Ituria bai Trakhonitia angkorni bagra, Lusanoske Abilinini bagra. **2** Hanna bai Kaiapha ochai bokhorok. Sakariani bvsala Johonni thani aphuru hasing panthoro Kaitorni kok sokphaio. **3** Bo Jordan tvibug ganaginio o kogno pirphaika, "Sumsok khibiui kha kiphildi, kha kiphilvi baptisma nadi, haikhe Kaitor norogni sumsok nakaranv." **4** O kok diari Jisaiani bvchabo svkangno omo haikhe svijak tongo, "Hasing panthoro khoroksani bokhorang hai hvnvi chirikhogjak: 'Porbuni bagvi lahar svnamdi, bo himnani lamarogno keplengkhe tondi! **5** Harung ma kuphungnai, haplok hatai ma hachernai; kokoi ma pengsanai, thatra butra

ma miliknai. **6** Hake bebak borok Kaitor rvmani rangma nugav!" **7** Bini thani baptisma nana hvnvi phainairogno Johon hai hvnvi saka, "Chibukni bosongrok! Kaitorni phainai busni kharvi yogna hvnvi norogno sabo wansukna rvlang?" **8** Haino hvnke norok kha kiphilvi sumsok khibika hvnvi sai manna tvikhe tongdi. 'Abraham chini pha hvnvi yogav,' kha ta kadi. Ang norogno sao, Kaitor o holongrognibo Abrahamni bvsa tikhlai mano. **9** Buphang yaphango rua harjak; bvthai kaham thaiya buphangno tanvi horo sogjagnai." **10** Aphuruke bororok bono hai hvnvi svngka, "Hake chvng tamo ma khvlainai?" **11** Bo bohrogno hai hvnvi saphika, "Khoroksani kamchlvi kangnvi tongkhe kvrvinno te kangsano rvthung, chana gvnangbo haino khvlaithung." **12** Brindiarogbo baptisma nana hvnvi phavi bono hai hvnvi svngka, "Hodakra, chvng tamo ma khvlainai?" **13** Bo bohrogno hai hvnvi saka, "Manthaini bara ta nadi." **14** Sengkvrakrogbo bono hai hvnvi svngka, "Chinile tamo vngnai?" Bo bohrogno hai hvnvi saka, "Sikiri sokorokhe mungsa phano segvi ta nadi, tataalkhe khoroksano phano ta phemlogdi. Aji manma baino kha kobolvi tongdi." **15** Lukurok aboni bagvi khapang svrangjagbaikha. "Johon da Masia vngvi tongkha jani?" hvnvi bohrok aphuruke kha bising bising wansugui tongbaikha. **16** Hake Johon bohrok bebagno hai hvnvi saka, "Ang norogno tvi baise baptisma rvo. Ani sai kvplai te khoroksa phaio; bini yaklab sokogna suda ang chugya. Bo norogno Phola Kvthar tei hor bai baptisma rvnai. **17** Khamparni bebak gomno chogvi gula thumui dabaina bagvi baling bini yagono tongo; gundaknokhe thviphlaiya horo sogvi khibibainai." **18** Abo haiketeibo kok kaham sate sate Johon bebagnono hamthoma pirvi tongkha. **19** Herod bagra bini takhukni hik bai tongmani tei samung hamyarok tangmani bagvi Johon bono khoraika. **20** Hake Herod bono jelo chobvi teibo samung hamya bangrvkha.

Jisu baptisma namani

21 Bui baptisma nakhe Jisubo baptisma nau parthona khvlai phuru nokha phiyogjakha. **22** Aphuruno Phola Kvthar pharuk vngvi bini aro bikhlai phaika. Chugnohani kok hai hvnvi saklajakha, "Nvng ani khajama Sajla.

Nvng ani kha svrangma."

Jisuni bosong

23 Nokha bisi kholchi vngthotok phuru Jisu samung chengsaka. Bo Josepm bvsala hvnvi lukurok hvno. Josep Helini bvsala, **24** Heli Mathatni, Mathat Lebini, Lebi Malkini, Malki Jannaini, Jannai Josepni, **25** Josep Mattithiani, Mattithia Amosni, Amos Nahumni, Nahum Heslini, Hesli Naggaini, **26** Naggai Mahatni, Mahat Mattithiani, Mattithia Simyini, Simyi Josekni, Josek Jodani, **27** Joda Johananni, Johonan Resani, Resa Serubbabelni, Serubbabel Sealtielni, Sealtiel Nerni, **28** Ner Malkini, Malki Addini, Addi Kasamni, Kasam Elmadamni, Elmadam Herni, **29** Her Jehochuani, Jehochua Eliesemi, Elieser Jorimni, Jorim Mathatni, Mathat Lebini, **30** Lebi Simionni, Simion Jehudani, Jehuda Josepni, Josep Jonamni, Jonam Eliakimni, **31** Eliakim Meleani, Melea Mennani, Menna Mattathani, Mattatha Nathanni, Nathan Daudni, **32** Daud Jisaini, Jisai Obedni, Obed Boasni, Boas Selani, Sela Nachonni, **33** Nachon Aminadabni, Aminadab A(lminni, Admin Arninl Arni Hesronni, Hesron Peresni, Peres Judani, **34** Juda Jakobni, Jakob Isakni, Isak Abrahamni, Abraham Terani, Tera Nahorni, **35** Nahor Serugni, Serug Rehuni, Rehu Pelegni, Peleg Eberni, Eber Selani, **36** Sela Kainanni, Kainan Arpaksadni, Arpaksad Semni, Sem Noani, Noa Lamekni, **37** Lamek Methuchelani, Methuchela Henokni, Henok Jaredni, Jared Mahalalelni, Mahalalel Kainanni, **38** Kainan Enosni, Enos Setni, Set Adamrii, Adam Kaitorni.

Jisu amjogjagmani

4

1-2 Phola Kvthar kuplungkhe Jisu Jordanni kiphilvi phaika. Hasing panthoro tubui Phola Kvthar bai bo nokha sal kholpenvi tviphrejakha. Aro bo Soitan bai amjogjakha. Aphuru bo mungsa phano chaya; abo laikhenok khuijakha. **3** Hake Soitan bono hai hvnvi saka, "Nvng Kaitorni

Sajlakhe o holongno ruti vngdi hvndi." **4** Jisu bono hai hvnvi saphika, "Elembago o kok tongo, 'Borok ruti simi chauvi thangya.'" **5** Soitan hake bono hatai kuchugo tvlangvi haktorni asvk hano mukphilik kaisa bai phunugui hai hvnvi saka, **6** "O harogni bebak suar bai jolma jolsano ang nono rvanv. Omorok bebak ano yapharjakha. Ang jesano phano rvi mano. **7** Nvng ano khulumke omorok bebak nono rvbaianv." " **8** Jisu hai hvnvi saphika, "Elembago o kok tongo, 'Nini Porbu Kaitorno simise khulumui suridi!' " **9** Hake Soitan bono Jerusalemo tvlangvi noktharni buchuk kuchugo bacharvi hai hvnvi saka, "Nvng Kaitorni Sajlakhe oroni hachero bakhlaidi. **10** Elembago o kok tongo, 'Bono yachagdi hvnvi Kaitor nini bagvi suarirogno dagianv.' **11** O kogbo tongo, 'Nini yakungo holong nangya tvi bohrok yak bai romphaianv.'" **12** Jisu bono hai hvnvi saphika, "Elembago o kogbo sajakka, 'Nini Porbu Kaitorno nvng ta amjogdi.'" **13** Poderepodkhe amjogvi vngjaglvyakhe Soitan bono yakarvi kvlangrakha.

Jisu Galilio samung tangramani

14 Jisu Phola Kvtharni phan bai Galilio kiphilvi phaika. Bini kok amchoi gvnangvi pirjakha. **15** Bo aroni kuthumnogrogo phrvngvi tongkha, hake joto bai baikhenejakha.

Jisu Nasaretrok bai rvkhlaijagmani

16 Aboni ulo Jisu Nasareto phaika, orono bo torkhalorkha. Sabbath salo bini khvlaimung haino bo kuthumnogo thangvi Elembak porina hvnvi bachakha. **17** Diari Jisaiani bvchap bono porina rvjakhe bo abono philvi kvrvngsa jitolo mankha, aro o kok svijak tongo, **18** "Porbuni Phola ani thani koboljak, kvrvirogni thani hamthoma pirna bagvi bo ano chongthar chongkha. Khajagrogno khengjak hvnvi saklaina bagvi, nuyarogno nugrvna bagvi, kusubjagrogno phiyogna bagvi, **19** phiya Porbuni mol kaham saklaina bagvi bo ano rohorka." **20** Bvchap kholobvi bo ayani yago rvi achukthani achuguikha. Kuthumnogni asvk bororok bonomang nasigvi tongbaikha. **21** Bo bohrogno hai hvnvi sana chengkha, "Norok Elembagni

o kok khvnama haino tinile nangphailaha." **22** Hake bebak borok bono baikhenebaikha, bini kok kaham khvnai bohrok wanajagvi hai hvnvi salaika, "Omo Josepni bvsalaya da?" **23** Bo bohrogno hai hvnvi saka, "Norok kogotongmano khurchai hai hvnvi sachesanai ta, 'Daktor, nvng sagno hamrvgradi.' Kapharnaumo khvlaio hvnvi khvnamani oro nini haobo khvlaidi." **24** Bo teibo saka, "Ang norogno soino sao, jani ja sagni kami diari gvnda khvlaijagya. **25** Ani o kok kubuino khvnadi, Eliani molo nokha bisi tham kvchar nokha muthubjagvi tongma bai watvi wayani bagvi aro belai chacharara nang phuru Israilo randijvkrok kvbangmase. **26** Bohrogno keboni thani rohorjagyai Sidon amchoini Sarepatni randijvk khoroksani thani Elia rohorjaksio. **27** Haike diari Elisani molo Israilo biadi chajagrok kvbangmase. Abohrogno bisingo Siriani Namanno simise hamrvjaksio." **28** Bini o kok khvnai kuthumnogni asvk bororok jaikhen o jolijagbaikha. **29** Bohrok bachai Jisuno dagarmang taunni phataro tvlangkha. O taun svnammani haduk buchukni khiklai rohorna hvnvi aro bono tvlangvi thangka. **30** Yangle bohrogno bising tvi bo ongkhorvi phaika.

Mvtai hamya kolobjagno Jisu hamrvmani

31 Aboni ulo Jisu Galilini Kapharnaum hvnvi tauno thangka. Hake Sabbath salo bo aro bororogno phrvngka. **32** Khvnanairok bini phrvngma tailno nugui wanajakha; tamni hvnke bini kok belai nangnaimang. **33** Kuthumnogo mvtai hamya kolobjak borok khoroksa tongo. Bo sotonvi chirikhogvi hai hvnvi saka, **34** "O Nasaretni Jisu, nvng chvngno tamo nangjak? Nvng chvngno go job khvlaina da phai? Nvng sabo ang sai mano. Nvng Kaitorni borok kvthar!" **35** Jisu a mvtaino hai hvnvi dagikha, "Siringcha vngdi! O borok bisingni ongkhorvi phaidi." Hake mvtai hamya bebagni bvskango bono buprai khiklai kvlangvi ongkhorvi thangka, bini mungsa phano hamya khvlai manlvya. **36** Hake jotono wanajagvi hai hvnvi salaika, "Omo tvma hvnmani kok? Bo suar kvplai vngvi dagima baise mvtai hamyarok ongkhorvi ma phaio." **37** Bini kok a amchoi gvnangvi pirjakha.

Borok kvbangmano Jisu hamrvmani

38 Jisu kuthumnogni Simonni nogo habvi thangka. Simonni bvkrajvk aphuru belaike lumjak, hake bini bagvi bohrok Jisuno koikha. **39** Jisu bini gana bachai damorokheno kulum svrai thangka, bobo logi logino bachai bohrogno lobo jobo khvlaika. **40** Sal habke jani ja nogni poderepod ham>aogno bini thani tubui rvphaika. Bo bohrogno jotono yak bai tangvi hamrvka. **41** Baksani sagni mvtai hamya "Nvng Kaitorni Sajla," hvnvi chirikhogvi ongkhorvi phaika. Bo bohrogno damorogvi o kogno sarvlvya, tamni hvnke bono Masia hvnvi bohrok sai mano.

Judiao Jisu hamthoma pirmani

42 Aichuk dorpho dorpho phuru, siring siring jitolo Jisu thangka. Lukurok bono naitugui tongkha, bohrok bono naitugui mankheno bohrogno khibi thangrvya khvlaina naikha. **43** Hake bo bohrogno hai hvnvi saka, "Kubun taunobo thangvi Kaitorni hani hamthoma pirna nanganv; omoni bagvino Kaitor ano rohoru." **44** Aboni ulo bo ha gvnangvi kuthumnogrogo hamthoma pirvi tongkha.

Puilani sagrirogno Jisu ringmani

5

1 Sal sa Gennesaret lik gana Jisu bachai tong phuru borok kvbangma usigvi payakhe Kaitorni kok khvnana hvnvi bini sago phai kvlai rvphaibaikha. **2** Bo lik gana hakungo gaborrogni rung khungnvi nuhuka; gaborrok rungni ongkhorvi jal sui tonglaio. **3** Hake rung khungchao bo kasaka - abo Simonni rung. Jisu a rungno hakungni teksa hachalo tvlangdi hvnvi Simonno saka. Bo aphuruke rungo achugui bororogno phrvngvi tongkha. **4** Bo kok sabavi Simonno hai hvnvi saka, "Tvi kuthugo rung tvlangvi jal bui a romdi." **5** Simon hai hvnvi saphika, "Hodakra, chvng hopung bu sini bui masa phano manya. Nini kok bai te waisa buikhe bui naiphina ta." **6** Bo sama haino jal bui nai ba a kvbangma kasau jalse

kichiktvtvi vngvi tongkha. **7** Hake bohrok kubun rungni logisongrogno yak tail khvlaihorvi chubaphaidi hvnhorka. Bohrok phavi rung khungnvi a supungphaika; belai hilikmani rungse kvlvkna navi tongasio. **8** Hai vngmarogno nugui Simon Pitor Jisuni yakungo kvlavi "Porbu, ang sumsok gvnang borok. Ani samni thangdi!" hvnvi saka. **9** Tvmani ba, asvk a kvbangma kvlaima nugui bo bai tei bororogbo wanajagbaikha. **10** Simonni logini Sebedaini bvsala takhuk nvi Jakob bai Johonbo abo haino wanajakha. Hake Jisu Simonno hai hvnvi saka, "Ta kiridi, tabukni simi nvng borok romanv." **11** Rung khungnvino hakungo tisai bohrok jetongmani khibi kabui Jisuno rvktharvi phaika.

Biadi chajagno Jisu hamrvmani

12 Jisu taun khungchao tongmani. Aroni bvsak gvnangvi biadi chajak khoroksa Jisuno nugui bini thani bolob khogvi hai hvnvi kovi saka, "Porbu, nvng ano hamrvnakhe hamrvi mano." **13** Jisu yak phologvi bono tangvi hai hvnvi saka, "Hamdi, ang naio." Logi logino bini biadi kvmai thangka. **14** "O kok kebono ta sadi, "hvnvi Jisu saka. "Thangdi, ochaino phunuguidi. Nvng tabuk hamka hvnvi lukuno phunugna bagvi Musi dagima haino chagma rvdi." **15** Hake sajavgi suda yang yang bini kogmang pirjakha. Bini kok khvnana hvnvi tei hamya hamna hvnvi aphuruke borok kvbangma kuthumui phaika. **16** Bokhe siring siring kvrvngsao parthona khvlai tongvikha.

Yakungyak manyano Jisu hamrvmani

17 Sal sa Jisu bororogno phvrngvi tongmani. Pharisairok tei Kerong phvrngnairogbo aro achugui bini kok khvnai tongo. Bohrok Galilini, Judiani bebak kamini tei Jerusalemni phaimani. Bo hamrvna bagvi Kaitorni f phan manjak. **18** Borok magnvitham waingokhe balvi yakungyak manya khoroksano tubui phaika. Bohrok bono nok bisingo sitogvi Jisuni bvsakango tonna naikha. **19** Borok usigvi payani bai lama manjagyai bohrok nukhung saka kasaika. Nukhung svplai waing bai a borogno buini

kvcharo Jisuni bvs kango tikhlai rohorka. **20** Bohrogni asvk poito nugui Jisu yakungyak manyano hai hvnvi saka, "Takhuk, nini sumsogrok nakarjakha." **21** Hake Kerong phvr vngnairok tei Pharisairok hai hvnvi wanasuklaikha, "Kaitorno kotoi khvlainai o borok sabo? Khoroksa phano sumsogno nakarvi mannai kvryi; Kaitor simise mano!" **22** Jisu bohrogni wansugma sai manvi hai hvnvi saka, "Tam vngvi norok abo haikhe wansuk?" **23** 'Nini sumsogrok nakarjakha,' hvnvi sana da laikuk, ebakhe 'Bachai himgradi,' hvnvi sana da laikuk - bubo laikuk? **24** Hake haktoro sumsok nakarnani suar Borogni Sajlani tongo abono ang norogno phunuganv." Hake a yakungyak manyano Jisu hai hvnvi saka, "Ang nono sao, bachadi, nini waing khochai nogo thangdi." **25** Bo aboni logi logino bebagni bvs kango waing khochai Kaitorno lobvtvi nogo thangka. **26** Bebagno panjalvi wanajakha, hake "Chvng tini wanamasingcha manvi nukha," hvnvi bohrok kirima habvi Kaitorno lobvi tonglaikha.

Lebino Jisu ringmani

27 Aboni ulo ongkhorvi thang phuru Lebi hvnvi brindia khoroksano bini ophicho achugui tongma nuhurvi "Ano rvkthardi," hvnvi Jisu bono saka. **28** Hake jetongkvrvi khibi kvlangvi Lebi Jisu bai thangka. **29** Lebi aphuruke bini nogo Jisuno twi panda kotor achugrvkha. Aro brindiarok kvbangma bai kubunni bororogbo baksakeno chathani achuglaikha. **30** Abo nugui Pharisairok tei Kerong phvr vngnairok "Norok tam vngvi brindiarok bai tei basijagrok bai chalai nvnglai?" hvnvi Jisuni sagrirognogno hunuhanaikhe saka. **31** "Kahamni daktor nangya, hamyanise nango," hvnvi Jisu bohrognogno saka. **32** "Borom gvnangrognogno ang ringna phaiya, kha Hphilrvna hvnvi basijagrognose ang ringna phaio."

Ubasni kok svngmani

33 "Johonni sagrirok udam udam ubaske parthona khvlaio, Pharisairognibo ahaino khvlaio; nini sagrirogle chao nvngogno," hvnvi bohrok Jisuno saka. **34** "Kaijagnaisa tongvtvi kailabarini nograirognogno ma chaya

vnganv da norok hvn?" hvnvi Jisu bohrogno svngka. **35** "Kaijagnaisano bohrok bai svkagvi tvlanganv omo tvi sal phaianv, aphuru bohrok chayai tonganv." **36** Hake Jisu bohrogno o rvngthomabo saka, "Ri kvtalno sichigvi khoroksa phano ri kvchamo thabya; thabke bo ri kvtalno kichigrvnai, phiya ri kvcham bai" kvtalni bokocho kvthaglak. **37** Ebakhe khoroksa phano angur bvtvi kvtalno tvk mosonjago tonya; tonkhe angur bvtvi kvtal a tvk mosonjagno recherachak khvlainai, hake bvtvibo kvsarbainai, tvkbo bainai. **38** Ihi, angur bvtvi kvtalno tvk kvtalono tonna nangany. **39** Bvtvi kvcham nvngbavi kebo kvtal sanya; tamni hvnke 'Kvchamno kaham,' hvnvi bo sao."

Sabbat salni kok svngmani

6

1 Sabbat salo Jisu gom bari kvchar tvi himvi tongmani. Bini sagrirok himlaitvtvi gom bvtang sachui yak bai mochle khugui chao. **2** Hake Pharisai magnvitham hai hvnvi saka, "Sabbat salo ta khvlaidi hvnvi chini Kerong samani abono norok tam vngvi khvlai?" **3** "Daud tei bini logisongrok ok khuijak phuru tamo khvlaika, abo suda norok porinaiya da?" hvnvi Jisu bohrogno kiphilvi saka. **4** "Bahaike Kaitorni nogo habvi Kaitorno barogjak a ruti bobo chakha, bini logisongrognobo charvkha - aile chini Kerong rvksake ochairok simise a ruti chai mano." **5** Kok manjui Jisu hai hvnvi saphika, "Borogni Sajla Sabbat salni bubagra."

Yak hoichajagno hamrvmani

6 Jisu tei kaisa Sabbat salo kuthumnogo habvi phvrngvi tongo. Aro borok khoroksa yagra yak hoichajak tongo. **7** Kerong phvrngnairok bai Pharisairok bvlam naitugui Jisuno majra berna nai tongo. Abo baino bohrok Sabbat salo bo khoroksa svkno hada hamrv hvnvi oirankhe naichomlai tonglaikha. **8** Bohrogni bvkhani wansugma Jisu sai mano. Bo aboni bagvi "Bvskango bachaphaidi," hvnvi yak hoichajak borogno saka.

Bo aro thangvi bachakha. **9** Hake Jisu bohrogno hai hvnvi saka, "Angbo norogno svngo, Sabbat salo chini Kerong tamo khvlaidi hvn? Kaham da khvlaidi hvn hamya? Mvthangdi da hvn buthardi?" **10** Bo yang yang bebagno naharvi a borogno hai hvnvi saka, "Yak phologdi." Abo hai khvlaike bini yak hamphika. **11** Abo baino bohrok belai jolijagvi Jisuno tamo khvlainai hvnvi bohrok Mching bohrok salai tongkha.

Jisu chonghor chigrivi chongmani

12 Aphuru parthona khvlaina hvnvi Jisu hataio kasai thangka; hopung Kaitorni thani parthona khvlaika. **13** Phung vngkhe bo sagrirogno bini thani ringkha, hake bohrogno bene chignvino chongvi bo chonghor hvnvi pharka. **14** Bohrokhe Simon (Jisu bono Pitor pharka) tei bini takhuk Andria, Jakob tei Johon, Philip, Bartholomai, **15** Mathai, Thoma, Alphaini bvsala Jakob tei Simon (bono 'Kvsrang' hvno), **16** Jakobni bvsala Juda, hvnke bono romrvnai Juda Iskariot.

Jisu lukuno phvrngmani tei hamrvmani

17 Hataini bohrok bai baksa Jisu ongkhorvi phavi teibo pal kotor sagrirok bai baksa panthoro bachaphaika. Aro Judia, Jerusalem, phiya Tur tei Sidon jola ganagini amchoini borok kvbangma phaika. **18** Bohrok bini kok khvnana tei hamya hamna hvnvi phaio. Mvtai hamya kolobjagrogbo aro phaika, habo hamrvjakha. **19** Bini bisingni phan ongkhorma nugui asvk borok bono tangna muchungjagbaikha. Bo bebagno hamrvi tongkha.

Kaham bai hamyani lama

20 Jisu bini sagrirogno nasigvi hai hvnvi saka, "Kvrvirok norok hamchanai; tamni hvnke Kaitorni ha norok mannai! **21** "Tabuk ok khuijagrok norok hamchanai; tamni hvnke norok ok supungjaganv! "Tabuk kabnairok norok hamchanai; tamni hvnke norok tongthogvi mvnvianv! **22** "Borogni Sajlani bagvi norogno bui naislekhe, norogno basike, norogno kulkhe tei norogni mung sitrarvkhe norok hamchanai! **23** Chugnohao

norogni manthaitok kvbangma tongo hvnvi aphuru norok tongthok barakhe mvsadi. Bohrogni bosong svkangrogbo diarirogno ahaino khvlaio. **24** "Phiya, gvnangrok norok hamya sitranai; tamni hvnke norok thongtok manvi paika! **25** "Tabuk ok pungjagrok norok hamya sitranai; tamni hvnke norok ok ma khuianv! "Tabuk mvnvnairok norok hamya sitranai; tamni hvnke norok khakamvi ma kabanv! **26** "Bui bai baikhenejakhe norok hamya sitranai; tamni hvnke bohrogni bosong svkangrogbo diari pajirogno ahaikeno baikheneo."

Arirogoo hamjagdi

27 "Ang samano khvnanairogno ang hai hvnvi sao: Norogni arirogno hamjagdi, norogno naislenairogni kaham khvlaidi. **28** Norogno svrainairogno kaham vngdi hvnvi saphidi, norogno kulnairogni bagvi parthona khvlaidi. **29** Khangar yasao bukhe te yasabo hadirvdi; dulai segke kamchlvibo rvdi. **30** Mungsa manvi kebo sanke bono a manvi rvdi; norogni manvi kebo tvlangkhe abono tei kiphilvi ta sanphidi. **31** Buini thani manna muchungma haino norok bohrogni thani khvlaidi. **32** "Norogno hamjagnairogno hamjakhe Kaitor norogno bvsvkle baikhenenai? Basijagrogno ham jakhe bohrogbo hamjakphiro. **33** Norogni kaham khvlainairogni simi kaham khvlaike Kaitor norogno bvsvkle baikhenenai? Basijagrogbo ahaino khvlaio. **34** Sui manthotokrogno simi solok rvkhe Kaitor norogno bvsvkle baikhenenai? Basijagrogbo abono manphina hvnvi basijagrogno solok rvo. **35** Phiya ba, norok arirogno hamjagdi, bohrogni kaham khvlaidi; solok rvdi, sujakphinani ta muchungdi. Haike norok manthaitok kvbangma mannai tei Paitomi bvsa vngnai. Tamni hvnke bo koplorogno tei chengtarognobo maia khvlaio. **36** Norogni Pha hai norogbo maia gvnang vngdi."

Buini bus thummarsi

37 "Buini bus ta thumdi, hake Kaitorbo norogni bus thumglak; kebono majra ta berdi, hake Kaitorbo norogno majra berglak; buino nakardi, hake

Kaitorbo norogno nakaranv. **38** Buino rvdi, hake Kaitorbo norogno rvanv; norogni yagni ura jangri svgvi supungvi rvjaganv, pungma barase kvsaranv. Norok buino suma haino Kaitorbo norogno sui rvanv." **39** Jisu bohrogno o rvngthoma saka, "Mokol nugya bai mokol nugya da lama phunugui tvlangvi man? Khorognvino hakoro kvlaiglak diba? **40** Phvrvngnaini sai svrvngnai torya; svrvng bai sukesse baksa vngnai. **41** "Nini takhukni mokolo buphang biphiring tongma simi nvng nugo, nini mokolni buphang bokochole tamni nugya sla? **42** Nini mokolo buphang bokochotong sak 'Phaidi, nini mokolni buphang biphiring khiklaigrana,' hvnvi nini takhukno bahai sanai ba? O phatra, nini mokolni buphang bokochotikhlaigradi, hake nini takhukni mokolni buphang biphiring kahamke nugyanv; aphuru nvng tikhlai mananv."

[Bvthai baino buphang sinijago](#)

43 "Buphang kaham bvthai hamya thaiya, phiya buphang hamyabo bvthai kaham thaiya. **44** Buphangno bvthai baino sai mano; busulvngo khvichang ebakhe batasongo angur kebo khagya. **45** Borok kaham bini kha kaham bisingni kaham tikhlaio; borok hamya ba hamya tikhlaio. Bvkhao kuplung vngvi tongma haino borok bukhuk bai sao."

[Nok tangnai khorognvirok](#)

46 "Norok ano tam vngvi 'Porbu, Porbu,' hvn, aile ang sama hai khvlaitiya? **47** Ani thani phavi ani kok khvnai abo hai samungbo tango bo bubo tvi borok sai khvnarvanv. **48** Bo holongdap saka nok tangnai hai. A borok nok tangna hvnvi hakor kuthukke chogvi holongdap saka nokthai svnamkha. Ulo tvisa tvi torvi dol kotor vngvi a nok lomphaika, a nogno kusta khvlai manlvya; tamni hvnke abo kvrakhe tangjak. **49** Phiya, ani kok khvnai abo hai samungbo tangya, bo nokthai kvrvio nok tang nai hai. Tvidol phavi a nok lomphaikeno abo bai thangka - bsvsk kha koromrere a nok baimani!"

[Sengvrak okrani selengno Jisu hamrvmani](#)

1 Asvk kothomarogno khvnanai lukuno sabaike Jisu Kaphamaumo thangka. **2** Aro Romni sengkvrak okra khoroksani seleng masa hamya kvlai thvina nai tongkha. Abo bini hamjagma borok. **3** Jisuni kok khvnaui a sengkvrak okra Judaini hoda magnvithamno bini thani rohorka. Hake ani selengno mvthangphaidi. hvnvi bo bohrogni yak tvi Jisuno kok kvcharvi rohorka. **4** Jisuni thani phai bohrok jaikheni kovi hai hvnvi saphaika, "O borok nini chubama manthai kvlaio. **5** Bo chini borogno hamjago, bono chini bagvi kuthumnok tangvi rvkha." **6** Hake Jisu bohrok bai thangka. Bo nok gana sokphai phuru a sengkvrak okra bini bikichingsongni khuk tvi hai hvnvi sarohorka, "Hodakra, nono tei lengrvlvya. Ani nogo nono kvlangnani ang chugya, **7** phiya nini thani angbo thangnani chugya. Nvng hvkeno ani seleng hamanv. **8** Angbo buini kotoino, ani sai kotoi sengkvrakno kvbangma tongo. Ani sai kotoi sengkvrakno 'Thangdi!' hvnke thango, 'Phaidi!' hvnke phaidi, selengnobo 'Khvlaidi!' hvnke abono khvlaio." **9** O kok khvnaui Jisu wanajakha; bono rvktharnai lukuno uphilvi hai hvnvi saka, "Norogno ang sao, Israilrogni bisingo phano bo hai poito gvnang ang nuyakho." **10** Jisuni thani rohorjagnairok nogo kiphilvi nai ba a seleng hamvi thangka.

Raodijvkni bvsalano Jisn nivthangniani

11 Aboni ulo Jisu Nain tauno thangka. Sagrirok tei pal kotor lukubo logi thangka. **12** Bo a taunni duglamtoro sokphaidoropkheni kvthvi tvlangma nukphaika. A kvthvi vngkha randijvk khoroksani songdari bvsala. Aroni borok pal kotor palsa bini logi logi. **13** Porbu randijvkno nugui khairogjagvi "Ta kabdi," hvnka. **14** Bo gana thangvi toloi tangvikha, kvthvi balnairogbo bathakka. Hake "O chvlasa, bachadi!" hvnvi Jisu dagikha. **15** Haikeno a kvthvi bachai kok sachaka. Jisu bono bumani yago kiphilvi rvkha. **16** Abono nugui bebagno kirima habvi Kaitorno lobvi, "Chini bisingo diari kotor khoroksa bachakha," hvnvi salaika. "Kaitor bini bororogno naikhlaika." **17** Judia gvnangvi tei ganagini amchoio Jisuni o

kok pirjakha.

Baptisma rvnai Johonni sagrirok Jisu bai malaimani

18 O kogrogno Johonni sagrirok bono khv narvkha. Johon bohrogno bisingo khorogvino ringvi **19** Porbuni thani rohorvi hai hvnvi svngrvhorka, "Khoroksa sokphainai hvnmani, nvng da a borok, chvng ba tei kubunno da nasingvi tongnai?" **20** A khorogvi Jisuni thani hai hvnvi saphaika, " 'Khoroksa sokphainai hvnmani, nvng da a borok, chvng ba tei kubunno da nasingvi tongnai?' abono sai manna bagvi baptisma rvnai Johon nini thani chvngno rohoroka." **21** Jisu aphuru poderepod hamyarogno hamrvo, mvtai hamya kolobjagrogno svrarvo, nuyarogno nugrvo khvlai tongma jora. **22** Jisu Johonni sagrirogno hai hvni saka, "Norok nugui thangmarogno, khvnai thangmarogno Johonno saidi: nugya nukha, khora himka, biadi hamka, nathong khvnaka, kvthvi mvthangjakha phiya kvrvirogni thani hamthoma pirjagvi tongo. **23** Ani bagvi kha mithigya bono hamchanai!" **24** Johonni sagrirok thangbaikhe Jisu lukuno Johonni kok hai hvnvi sachaka, "Norok tam vngvi hasing panthoro thang? Nolphangno nobar bai narjagmano naina da thang? **25** Hake tamo naina thang sla? Ri jilijalak kangnairok tongthok chathok tongnairok dolanpakiose tongo. **26** Hake tamo naina thang sla? Diarino da? Au, ang norogno sao, diarini sai phano kotorno norok nugbukha. **27** 'Naidi, nini svkang ang titun rohoranv; bo thangravi nini lama svnamvinai,' hvnvi Elembago svijak tongmani abono o borok. **28** Ang norogno sao, achainairogni bisingo Johonni sai kotor kvrvvi, ha: phanose Kaitorni hani jotoni borok kusu phanose bini sai kotor hvnjago." **29** (Johonni pirma khvnai borok bebak tei brindiarok suda bini baptisma nakha. Abo bai bohrok Kaitorni dagimano kaham hvnvi gosika. **30** Tvmakhe Pharisairok tei Kerong phrvvngnairok Johonni baptisma nayai Kaitorni lamani phervi tongrvkha.) **31** "Hake tabukni bororogno tamo bai sunai? Bohrok tamo hai? **32** Bohrok bajar kvcharo achugui hai hvnvi salaihornai chvrairok hai, 'Norogni thani chvng sumui tamkha, norogle mvsa mvsa! Chvng muisubuk chau kapkha, norogle kase kabya! **33** Baptisma rvnai Johon bo

maibo chaphailvya, angur bvtvibo nvngphailvya, hake 'Bo mvtai hamya kolobjak,' hvnvi norok hvnka. **34** Borogni Sajla bo chaphaika nvngphaika, hake norok hai hvnvi salaitikha, 'Nahadi khoroksano, bo chaphlak nvngphlak, brindiarogni tei basijagrogni bayab!' **35** Hai phano bebak gosinairogni thani Kaitorni elem kubuino sijago."

Pharisai Simonni nogo Jisu

36 Pharisai khoroksa Jisuno chanani kobokha. Jisu bini nogo thangvi chana achukha. **37** A tauno khankijvk masa tongo. Jisu a Pharisaini nogo chana achukha hvnvi bo sai mankha. Bo aphuruke holongphurni jamokhe thok motom tubui phaika. **38** Uklogo Jisuni yakung gana thangvi bachai kaptvtvi mokol muktvi bai bini yakung misika. Hake bo bvkhvnai bai hui Jisuni yakung motom sui a thok motomno phului rvkha. **39** Jisuno kobognai Pharisai abono nugui hai hvnvi wansukka, "O borok kubuino diari vngmate bubo tvi bvrvi bono tangphaika bo katsvi sai mankhamu; a bvrvi khankise hvnvi bo sai mankhamu." **40** Jisu bono hai hvnvi saka, "Simon, nono ang kisa sana tongo." "Sadi ta, hodakra," hvnvi Simon saphika. **41** "Lakai rvnai khoroksani thani borok khorogvini lakai tongo," hvnvi Jisu saka. "Khoroksani rvjak ba, te khoroksani kholpenvichi. **42** Bohrok khorogvino lakai sui manlvyakhe bo bohrogni lakai yakarvi rvkha. Sachidi tabuk, bono sabo hamjakuknai?" **43** Simon hai hvnvi saphika, "Lakai kvbang yakarjagnaino hvnvi ang kha kao." "Au, nvng soino saka," hvnvi Jisu saka. **44** Jisu aphuruke a bvrvini phasing uphilvi Simonno hai hvnvi saka, "O bvrvino nuda nukha? Nini nogo ang phaika, nvng yakung sunani tvi rlvya. Bo muktvi baise ani yakung sui bvkhvnai bai hui rvkha. **45** Nvng ano motom sui lamjaksogya, phaimani simi bole ani yakung motom suimang tongsio. **46** Nvng ano khorogo thok rvsogya, bole thok motom baise ani yakung suchasokka. **47** Aboni bagvi ang nono sao, bini sumsok kvbangma phano nakarjagbaikha, abo baino bini hamjagma kvbang. Sumsok nakarma bangyakhe, hamjagmabo bangya." **48** Hake Jisu a bvrvino hai hvnvi saka, "Nini sumsogrok nakarjagbaikha." **49** "Sumsok suda nakarnai bo sabo?" hvnvi Jisu bai chalainairok salai

tongkha. **50** Jisu a bvrvino hai hvnvi saka, "Nini poito baino nvng rangma mankha. Kaham kvrvngkhe thangchidi."

Jisuni logi brrvi magnvitham

8

1 Jisu aboni ulo kamirogo tei taunrogo thangtvtvi Kaitorni hani hamthoma bebagno pirvi tongkha. Sagri chignvi bini logi thangka. **2** Bvrvi magnvitham bini logio. Bohrok hamya hamrvjak tei mvtai hamya kolobjagvi svrajak - bohrogni bere Mariam (bono Magdalinibo hvno), bini bisingni mvtai hamya maksini rvkhilai rohorjakha; **3** Herodni menajar Khusani bihik Johanna, Suchanna, phiya teibo bvrvirogbo tongo. Bohrogni parima tvi Jisu bai bini sagrirogno bohrok jugali rvo.

Maichivi sarmani rvngthoma

4 Taun brum brumni asvk borok Jisuni thani kuthumphaika. Aphuru Jisu o rvngthoma saka, **5** "Maichivi sarna hvnvi khoroksa thangka, Sar phuru maichlvi baksa lama kvlavi kaduljagvi toksatoktvirok chakha. **6** Baksa ba holongsikio kvlaikha. Bumuk perkha bla, tos kvrvini bai ramprai thangka. **7** Baksa ba busulvngo kvlaikha. Busurok abo bai baksa torsauui kobolvi khibika. **8** Baksa ba ha kahamo kvlaikha. Abohrok torvilogvi bvthai rasa thaika." Obono saui Jisu hai hvnvi sotonvi saka, "Khunju tongkhe ba o kogno khvnadi."

Tam vngvi rvngthoma sajakka

9 Bini sagrirok Jisuno a rvngthomani gujok svngka. **10** Bo ahai hvnvi saka, "Kaitorni hani kok huijagrogno norogno sai manrvkha; phiya obonono buino rvngthoma tvi sajakka. Hake bohrok nugvibo nugya, khvnaibo sai manya vngthung."

Maichivi sarmani rvngthoma Jisn svbai samani

11 "O rvngthomani gujokhe ahai: a maichlvino Kaitorni kok. **12** Kok khvnanairogno poito thangvi rangma ta marithung hvnvi Soitan bohrogni kha bisingni kok tvlangphaio. A borogno a lamao kvlainai maichivi. **13** Kogbo khvnao, khapang svrangjagvi khaobo chobo. Bohrogni bvka belai thene, poitobo svrapsani, aboni bagvi amjogjakhe belogjakhe bohrok usuluo. A borogno a holongsikio kvlainai maichivi. **14** Kogle khvnao; tvmakhe svngcharni wanamawansugma, rangri, tongthokchathok phavi a kogno kobolvi khibio, hake bumuk chaya vngvi thango. A borogno a busulvngo kvlainai maichivi. **15** Kok khvnaui sutrangke kha kaichomvi soima baikhe thairvnairogno a ha kahamo kvlainai maichivi."

Chati kholobjagya

16 "Chati phvngvi kebo tvk bai kholobvi tonya, chuki tolabo tonya. Tvmakhe nok bisingo habnairok pilala nugna tvi thopnaono tono. **17** Huijak tonmarok phunugjaganv, kholobjagrpk pilala tikhlaijagvi nugjaganv. **18** "Bahaike khvnaka aboni bagvi hus vngdi. Gvnang teibo rvjaganv, phiya tongo hvnvi kha kamani abo suda kvrvini tvlangjaganv."

Jisuni sagni borok

19 Jisuni buma bai bini takhuksong bo bai malaina hvnvi phaika. Borok usigvi payani bai bini thani thangvi manlvya. **20** Hake bono hai hvnvi sajakka, "Nvma bai nini takhuksong nvng bai malaina hvnvi phataro bachai tongphaika." **21** Jisu bohrogno hai hvnvi kiphilvi saka, "Kaitorni kok khvnai rakhognairok bohrokse ani ama, ani takhuk."

Jisu nobar boraja thagrvmmani

22 Sal sa Jisu bini sagrirok bai rungo kasai hai hvnvi saka, "Hvmtho, chvng likni ayang naro thanganv." Hake bohrok rung chokha. **23** Thangtvtvino Jisu muktrvi thangka. Yangle liko nobar boraja sipchai phaika, hake rungo tvi pungvi bohrok kvlvkna naikha. **24** Bohrok Jisuni thani thangvi sochai hai hvnvi saka, "O hodakra, hodakra! Chvng thvina

naikha." Jisu sichau no bar bai tvi bvlabno damorogvi rvkheno no bar thagvi kvchang kvchang vngkha. **25** Hake bo bohrogno hai hvnvi saka, "Bihi sla norogni poito?" Bohrok kibo kirijakha, wabo wanajakha, bohrok kiching bohrok salaika, "Bo sabo? No bar bai tvino dagiui bini dagima khv narvi tong!"

Mvtai hamyarok kolobjagno Jisu svrarvmani

26 Bohrok Gergesenrogni amchoio sogvika; abo Galili bai dadadidik, likni ayang naro. **27** Hakungo onghorma logino a taunni mvtai hamyarok kolobjak borok masa Jisuni thani sokphaika. Bumasingni simi bo ri kanlvya, nogobo tonglvya, simalvngose tongo. **28** Jisuno nukheno bo chirikhogvi bini bvs kango kvlaiphaika, sotonvi hai hvnvi saka, "O Paitorni Sajla Jisu! Nvng ano tamo nangjak? Ang kojiao ano ta satogdi!" **29** Tamni bo a kogno saka hvnke, Jisu mvtai hamyano a borok bisingni ongkhorvi phaidi hvnvi dagikha. (A mvtai hamya svkango bono teibo kvbangma kolobkha; bono sorni dvkhvi bai yakung yak khau mrvk phano mvtai hamya kolob phuru bo dvkhvi sachui siring siring kvrvngsao tvlangvi thangjago.) **30** Jisu bono hai hvnvi svngka, "Nini mung tamo?" "Pal," hvnvi bo saka, tamni hvnke mvtai hamya kvbangma bono kolobkha. **31** Bohrogno gohina ta rohortung hvnvi bohrok Jisuno koikha. **32** Aro hadugo wak pal kotor ada chalai tongmani. Hake mvtai hamyarok Jisuno hai hvnvi koikha, "U wakrogni bisingo chvngno habrvdi." **33** Bo bohrogno dagikhe a borok bisingni ongkhorvi wakrogni thani habvi thangka, haikeno asvk wakrok harvbrani sotonvi khachiglaivi liko kvlvngvi thviphaibaikha. **34** Abono nugui wak mrvvgnairok khachigvi thangka. Bohrok a vngmano tauno tei kami rogo sai rvibaikha. **35** Hake tamo vngkha hvnvi naina bagvi bororok ongkhorvi thangka. Bohrok Jisuni thani phavi a mvtai hamyarok kolobjagno svrajak nukphaika; bono richum kanvi Jisuni yakung yaphango bokhorok kaham kvrvngkhe achugui tongma nugui bohrok kirijakha. **36** Mvtai hamyarok kolobjak bahaike svrarvjakha abono nugnairok borogno omono sai khv narvkha. **37** Gergesemogni amchoini bebak borok belai kirima habvi Jisuno aroni thangjadi hvnvi saka. Hake

Jisu rungo kasai kiphilvi thangka. **38** Mvtai hamyarok kolobvi svrajak Jisu bai tongna bagvi koikha. Tvmakhe Jisu bono hai hvnvi sai kiphilvi rohorka, **39** "Nvng nogo kiphilvi thangdi. Kaitor nini bagvi asvk samung khvlaimano sai khvnarvdi." Jisu bini bagvi asvk samung khvlaimano bo thangvi taun gvnangvi pirvikha.

Jisu Jairni bvsajvkno mvthangmanj tei bvrvi khoroksano hamrvmani

40 Lik ayang narni Jisu kiphil phuru nasingvi tongnai lukurok bono borisokka. **41** Aphuru Jair hvnvi aroni kuthumnogni hoda khoroksa phaika. "Ani nogo himjadi," hvnvi bo Jisuni yakungo kvlavi koikha; **42** tamni hvnke nokha bisi chignvi kathotok bvsajvk masasusuk laitvi laitvi vngvi tongkha. Jairni nogo thang phuru yang yangni luku kvbangma Jisuni thani kvlai rvphaibaikha. **43** Nokha bisi chignvi vngkha ri suma thagya bvrvi khoroksa luku bisingo tongo. Bini tongkvrvi svbai bavi ochai khama. nairvi naikha, kebo hamrvni manlvya. **44** A bvrvi luku bising tvi Jisuni uklogo phavi bini dulai buchuk tangvi rvphaika. Aboni logino thvi thakka. **45** "Ano sabo tangphai?" hvnvi Jisu svngka. Kebo gosilvya, hake Pitor hai hvnvi saka, "Hodakra, yang yangni borok kvbangma nini sago haino kvlai rvphaijak bla!" **46** Jisu hai hvnvi saphika, "Ano khoroksa svk tase tangkha ta. Ani bisingni phan ongkhorvi thangma ang thikna mano." **47** Omono khogvi tonvi manna nuhulvyakhe a bvrvi kvlvitvtvi Jisuni yakungo kvlai rvphaika. Hake tamni bagvi bo Jisuno tangkha, bahaikhe tangma logino hamka, bebagni bvsakango bo o kogno sai khvnarvkha. **48** Jisu bono hai hvnvi saka, "Bvrvima, nini poito nono hamrvka. Kaham kvrvngkhe thangchidi." **49** Bo kok saise tongkho aphuru kuthumnok hodani nogni borok khoroksa hodano hai hvnvi saphaika, "Nvsajvk thvika. Hodakrano tei ta lengrvsidi." **50** Jisu o kok khvnai Jaimo hai hvnvi saka, "Ta kiridi, poito simi khvlaidi. Bo thangphinai." **51** Jisu nogo sogvike Pitor, Johon, Jakob bai bvrvini maphano simi habrvni tei kebono habrvlvya. **52** Bebagno a bvrvini bagvi muisubuk chauvi kablai tonglaikha. "Ta kapsidi, bo thviya - thuisse tongo!" hvnvi Jisu saka. **53** Bo kvthvise hvnvi bohrogle sai manjak bla, aboni bagvi bohrok bono mvnvilai tongkha. **54** Jisu bini yak romvi, "O

bvrvima, bachadi," hvnvi sotonvi saka. **55** Hake phola kiphilvi bo doropsa bachakha. "Bono chana rvgradi," hvnvi Jisu saka. **56** Buma buphasong belai wanajagbaikha. "O vngmano kebono ta sadi," hvnvi Jisu bohrogno ragdama khvlaika.

Sagri chignvino pirna rohormani

9

1 Sagri chignvino Jisu thanchake ringvi bebak mvtai hamya rvkhlainani bai hamyarok hamrvnani bor rvkha. **2** Hake Kaitorni hani kok pirnani tei hamyarogno hamrvnani bagvi bo bohrogno rohorka. **3** Bo bohrogno hai hvnvi saka, "Lama himthani mungsa phano ta tvidi; latha buya, bogol buya, maichu buya, rang buya, kamchlvi suda kangsani bara ta tvidi. **4** Norogno tongna rvmani nogono tongdi, phiya aroni simi lam rvphidi. **5** Norogno borisogyarogni taunno khibi kabudi. Bohrogno hus khvlairvna bagvi yakung hadvlvi buprai kabudi." **6** Sagrirok kaglaiphai kami brum brum thangvi joto jitolo hamthoma pirna bai hamya hamrvma bai khvlai tongvilaikha.

Herodni wanama

7 Galilini bagra Herod asvk vngmarogno khvnai belai kvmamkha; tamni hvnke baptisma rvnai Johon thangchaphiro hvnvi baksa baksa salaio. **8** Baksa ba Elia nugjakphaio hvnvi salaio, baksa ba agini diarirogni khoroksa thangchaphiro hvnvi salaiphiro. **9** Herod hai hvnvi saka, "Angse Johonni bokhorok tanrvnai. Omo tvi kogmung khvnamani obole sabo sla?" Bo Jisu bai malaina hvnvi kaphrai tongkha.

Borok sai bano Jisu charvmani

10 Chonghorrok kiphilvi bohrok khvlaiphaimarogno Jisuno saphaika. Bo bohrogno Betsaida hvnvi tauno tepsake tvlangvi thangka. **11** Luku abono sai manvi rvktharlaikha. Hake Jisu boh rognogno borisokka, Kaitorni hani kok

bohrogno sai phiya hamna muchungnairogno hamrvi tongkha. **12** Sal thanganoggo sagri chignvi Jisuno hai hvnvi saphaika, "O bororogno rohorchidi. Bohrok ganagini nokhugo thangvi tongna-chana jugalithung; tamni hvnke chvng mungsa phano manthogya panthor kvcharo tongo." **13** "Norogno bohrogno chana rvdi," hvnvi Jisu saka. Hake bohrok hai hvnvi salaika, "Ruti lebba bai a magnvi simi chini thani tongsio. Asvk borogni chamungno nvng chvngno thangvi paidi da hvn?" **14** (Aro chvlarok simino sai ba vngthotok) Jisu bini sagrirogno hai hvnvi saka, "Buthup buthup khvlai buthubo kholpenvichikhe achugrvdi." **15** Sagrirok bebagno haike achugrvkha. **16** Jisu a ruti lebba bai a magnvi nau nokhacha naisaui doinobad rvkha. Bo ruti bai ano svkagvi lukuno rvdi hvnvi sagrirogno rvkha. **17** Bohrok bebagno jaikhe chau ok pungkha. Tei phindrik phandrak tongrvgmano sagrirok ura chignvi kochakha.

Jisuno Khristo hvnvi Pitor gosimani

18 Sal sa Jisu saichung parthona khvlai tong phuru sagrirok bini thani phaika. Bo sagrirogno hai hvnvi svngka, "Luku ano sabo hvn?" **19** Bohrok hai hvnvi saphika, "Baksa hvno baptisma rvnai Johon, baksa ba hvno Elia, phiya agini diarirogni here khoroksa thangchaphiro hvnvi baksa ba salaio." **20** Jisu bohrogno hai hvnvi svngka, "Norogle tamo hvn? Ang sabo?" "Nvng Khristo, Kaitor bai rohorjagnai Masia," hvnvi Pitor saphika.

Bini thvinani kok Jisu svkang baira samani

21 "Buino omono ta sadi," hvnvi Jisu bohrogno ragdamakhe sai rvkha. **22** Bo hai hvnvi sakua, "Borogni Sajla panjalvino satogjagna nangnai, okrachakrarok, ochai okrarok tei Kerong phvrvngnairok bai norjagna nangnai. Bo butharjagnai, phiya sal thamni salo mvthangvi bacharvjakphinai." **23** Bo bebagno hai hvnvi saka, "Ano rvktharnakhe bo sagno ma kamai, sal brum brum sagni kurus balvi ano ma rvktharnai. **24** Sagni langma narvkna muchungnai, bo abo kvmajagnai; phiya ani bagvi langma svkvmanai, bo abono narvknai. **25** Sagni langma kvmaui ebakhe

komorvi thangvi bebak svngcharno manvibo a borok tamo manma kvlai?

26 Ano twi eba ang samano lachijakhe Borogni Sajlabo sagni, Buphani tei suari kvtharrogni chvngsacha bai phai phuru bono twi lachijagnai. **27** Ang norogno soino sao, oro baksa tongo Kaitorni ha nugya sak thviglak."

Jisu khunchlaimani

28 O kogrok salaimani nokha sal char vngthotok ulo Pitor, Johon tei Jakobno tvlangvi Jisu hataio kasai parthona khvlaina thangka. **29** Bo parthona khvlai tong phuru bini mvkhang juda vngthangka, bini riok chvngsavi phurchai phaika. **30** Achomsa borok khorognvi bo bai kok salai tonglaiphaika. Bohrok vngkha Musi bai Elia. **31** Bohrok chugnohani chvngsacha bai nugjagvi Kaitorni tholma hai Jerusalemo bini thvinanino salai tonglaikha. **32** Pitor bai bini logisongrok jaikheno muktrvi thangjak. Bohrok sichau Jisuno chvngsachake borok khorognvi bai bachajak nukha. **33** A borok khorognvi thangna nai phuru Pitor Jisuno hai hvnvi saka, "Hodakra, chvng oro tongmani hamo. Chvng oro basai khungtam tangany, nini khungcha, Musini khungcha tei khungcha Eliani." (Aile bo tamo sai tongkha bono sai manya.) **34** Bo a kok sai tong phuru chumui dolasa bohrogno kholobvi kvlangkha; chumui kolobjakheno sagrirok kirijakha. **35** Hake chumui bisingni o kok sajakka, "Bo ani Sajla, ani chongjak - bini kok khvnadi!" **36** O kok sajabbaikhe nai ba Jisu saichungse. Sagrirok siring sorok, a nugmanino aphuru bohrok thaicha phano salvya.

Jisu chvrai masano svrarvmani

37 Teini salo bohrok hataini ongkhorvi phaike luku kvbangma Jisu bai malaiphaika. **38** Luku kvbangma bisingni borok khoroksa chirikhogvi hai hvnvi saka, "Hodakra, ani aibsano kitsa najjabadi, angsvla omo sirnino. **39** Bono mvtai hama masa achomsa chirikhogvi kolobphaio. A mvtai bono mothorvi khuk tvi phena ongkhorvo; bono akkhinino lengkhrokro khvlaiya sak thangna naiya. **40** Nini sagrirogno svrarvjadi hvnvi koimani bohrok manlvya." **41** Hake Jisu hai hvnvi saka, "Norok bsvskse poito kvrvv gvja!

Norok bvsvk bebul gvja! Norok bai ang te sal bvsvk ma tongna nangno? Te sal bvsvk ma soina nangno? Tubudi nvsalano." **42** A chvrai phai phuru bono a mvtai mothorvi buprai khiklai rvkha. Jisu a mvtai hamyano damorogvi chvraino svrarvi buphano kiphilvi rvkha. **43** Kaitorni phan kvplaino nugui bebagno wanajakha.

Bini thvinani kogno Jisu mobaikhe wainvi samani

Jisuni khvlaimarogno nugui bebagno wanajagvi kvmamvi tongbaikha. Aphuru Jisu bini sagrirogno hai hvnvi saka. **44** "Ani o kogrogno khunju kandi. Borogni Sajlano borogni yago yapharvi rohorjaganv." **45** Bohrok o kogno gujok sai manlvya; sai ta manthung hvnvino omoni gujok svbajjagya. Hai phano bohrogbo gujok svngraglvya.

Sabo torkuk?

46 Bohrogni bisingo sabo torkuk, o kogno twi sagrirok tokra rvlai tonglaikha. **47** Jisu bohrogni khani kok sai manvi chvrai masa naharvi gana bacharvi **48** hai hvnvi saka, "Ani mungvi o chvraino yachagnai, bo anono yachago; phiya ano yachagnai, bo ano rohornaino yachago. Norogni bisingo kusu, bono torkugo."

Bebailoyakhe bo norogni bailose

49 Aphuru Johon hai hvnvi saka, "Hodakra, nini mungvi khoroksano mvtai hamyarok rvkhaimani chvng nukha. Chini borogya hvnvi bono ahai ta khvlaidi hvnka." **50** Jisu bono hai hvnvi saka, "Ta bathagrvedi. Bebailoyakhe bo norogni bailose."

Samariani kami khungcha Jisuno yachaksoglvya

51 Chugnohao tvlangjagnani samparvrvk Jisu Jerusalemo thangnani asvkno chaitogravrkv. **52** Hake bo kok tunnani borok rohorgrakha. Nangmani manvi jugalina hvnvi bohrok Samariani kami khungchao

thangvi habvika. **53** Tvmakhe Jerusalemo thangnani chaitogjak hvnvi aroni bororok bono yadiaglvyva. **54** Sagri Johon bai Jakob abono nugui hai hvnvi saka, "Porbu, bohrogno gaija rvna bagvi chvngno nokhani hor ringdi da hvn?" **55** Jisu bohrogno/uphilvi nasigvi kulkha. **56** Aboni ulo bohrok te khungcha kami thangka.

Jisuno rvktharna nainai khorokthamrok

57 Bohrok lama himvi tong phuru borok khoroksa Jisuno hai hvnvi saka, "Nvng thangthani angbo rvktharnai." **58** Jisu bono hai hvnvi saka, "Sialni hakor tongo, toksatoktvirogni bothop tongo, Borogni Sajlanile kvrvngsa phano bokhorok bomnase kvrvi." **59** Bo te khoroksano hai hvnvi saka, "Ano rvkthardi." Hake a borok Jisuno hai hvnvi saka, "Aphano phobvi rvigrana." **60** "Kvthvi bai kvthvinono phobrvna rvdi," hvnvi Jisu saphika. "Thangdi nvng, Kaitorni hani kok pirvidi." **61** Te khoroksa hai hvnvi saka, "Hodakra, ang nono rvktharnai, tvmakhe nogni bororogni thani saina rvgradi." **62** "Al chuaina naui uklog nasig nasignai bo Kaitorni hani borok vngna chugya," hvnvi Jisu saka.

Sagri kholpethani-chignrirogno pirna rohormani

10

1 Aboni ulo Porbu teibo sagrirok kholpetham chignvino chongphika. Bo thangna hvnvi tongma kamirogo taunrogo bohrogno kvnvi kvnvikhe rohorgrakha. **2** Bo bohrogno hai hvnvi saka, "Mai kvbangma, phiya ranaise bangya. Abo baino kheto teibo ranaisa rohorna tvikhe kheto nokphangno koidi. **3** Thangdi, geguma kvcharo mera bvsano rohorma haike ang norogno rohorka. **4** Rang buya, bogol buya, yaklab buya mungsa ta tvidi. Jotono khulumna bagvi lamao ta bathagdi. **5** Nogo sogvikeno cO nogni kaham vngthung,' hvnvi sagradi. **6** Aro kha kaham khatungnai borok tongkhe norogni kaham bini vnganv; kvrvikhe ba norogni thani phaipiranv. **7** A nogono tongvi bohrok chana nvngna rvmano chai tongdi; tamni hvnke

manthai joratvino tangnaisa manna kvlaio. Nok khungcha khibi te khung chao ta thangdi. **8** Norok habvimani taunni borok norogno yachaksokke bohrok chana rvmano chadi. **9** A taunni hamyarogno hamrvi ahai hvnvi sadi, 'Kaitorni ha norogni gana sokphaika.' **10** Phiya norok habvimani taunni borok norogno yachaksogyakhe lamao ongkhorvi thangvi ahai hvnvi sadi, **11** 'Norogni taunni hadvivi suda yakungo nangmani norogni bebail bai hui khibika. Tvmakhe kahamke maitu narvgdi, Kaitorni ha norogni gana sokphaika!' **12** Ang norogno sao, jerani salo Sodomni sai phano o taun belai digisigi vnganv."

Poito kvrvi taunrok

13 "Aha Khorachin! Aha Betsaida! Norok hamya sitranai! Norogni bisingo wanamasingcha phan kvrak samung tangjagma hai Tur bai Sidono tangjagma te bohrok kha kiphilka hvnvi phunugna bagvi bumasingono pudri kanvi sago thapla phului tongkhamu. **14** Jerani salo Tur bai Sidonni sai phano norogno belai digisigi vnganv. **15** Nvngla Kapharnaum! Nvng da chugnoha svk chukna naimani; Nvng gohina khiklaijaganv!" **16** Jisu bini sagrirogno hai hvnvi saka, "Norogni kok khunju kannai, bo ani kogno kano; norogno yachagyakhe bo ano yachagya kvlaio. Ano yachagyakhe bo ano rohornaino yachagya kvlaio."

Sagri kholpethamchignvirok kipbilmani

17 Tongthok barakhe sagri kholpethamchignvirok kiphilvi Jisuno hai hvnvi saphaika, "Porbu, rrini mungvi mvtai hamyarok suda chini thani ma bomo." **18** Jisu hai hvnvi saphika, "Ang Soitanno nokha philikma haikhe chugnohani kvlaima nukha. **19** Khvnadi! Ang norogno chibuk sindrai saka tvi kachrebvi thangvi manhani bor rvkha. Soitanni bebak phanno yapha chobnani bor rvkha, kusu phano kusta khvlai manglak. **20** Hai phano mvtai hamyarok ma bomkha hvnvi ta tongthogdi; aboni sai chugnohao norogni mung svijakka hvnvisi norok tongthogdi."

Jisuni kbapang svrangmani

21 Jisu aphuruno Phola Kvthar bai bab nangvi khapang svrangjakha. Aboni bai bo hai hvnvi saka, "O chugnoha bai haktorni bubagra Apha, nono doinobad. Nvng borok siyarogni thani omorogno svplai elem gvnangrok bai sinairogni thani kotonrvi tonkha. Au, Apha, nvng omono kaham bvnvi kha chongmani." **22** "Apha ani yago bebagno rvbaikha. Aphano karvi Sajlano sininai kvrvvi, phiya Sajlano karvi Aphano sininai kvrvvi; Sajla sinirvna muchungma borok simino sinio." **23** Sagrirogni phasing uphilvi Jisu bohrogno simi hai hvnvi saka, "Omorogno nugma bai norok hamchanai! **24** Ang norogno sao, norok nugmano asvk diarirok, asvk bagrarok naina muchungvi suda nugya, norok khvnamano khvnana muchungvi suda khvnaya."

Samariani borok kaham

25 Kerong phvrngnai khoroksa Jisuno potali naina bagvi gana bachai hai hvnvi svngka, "Hodakra, thviyani langma manna bagvi ang tamo khvlaina nangno?" **26** "Kerongo tamo svijak tong? Nvng tamo sai mankha?" hvnvi Jisu bono svngka. **27** Hake bo hai hvnvi saphika, "Nini Kaitor Porbuno nini bebak kha bai, khuk bai, langma bai, parima bai hamjagdi,' phiya, 'Nvng sagno hamjagma haino nokarino hamjagdi.'" **28** Jisu hai hvnvi saka, "Soino saka; obo haino khvlaidi, hake thanganv." **29** Tvmakhe Kerong phvrngnai sak rvngjagmano bolavi Jisuno hai hvnvi svngka, "Ani nokari sabo?" **30** Jisu hai hvnvi saphika, "Borok khoroksa Jerusalemni Jerikho thangmani. Lamao bo dagaitrogni yago kvlaikha. Bohrok bini bebagno segvi bui thvitvtvikhe khibi kvlangvi thangka. **31** Ochai khoroksabo aphuru achomsa a lama tvi thangphaima jora. Bo a borogno nugui phervi thangka. **32** Abo haikeno Lebi khoroksa aro sokphavi bono nugui phervi thangkua. **33** Phiya, Samaria khoroksa a lama tvi thang phuru a borogni thani sokphaika. Bono nugui bo khairogjakha. **34** Bo gana thangvi a borogni kvsao thok bai angurni arak phului khai rvkha; ulokhe sagni korai saka kasarvi nograi nogo tubui bono sondonkhe naikha. **35** Teini salo bo nograi nogni bubagrano rukphaini rang kvnvi tikhlai rvi hai hvnvi saka, 'O borogno sondonkhe naisogdi. Omoni sai teibo rang baimano ang kiphil

phuru suphaianv.' **36** Tabuk, o khorokthamni bere sabo dagaitrogni yago kvlainaini nokari? Nvng tamo hvn?" **37** Kerong phvrngnai hai hvnvi saka, "Bono khairogjagnai." "Thangdi, nvngbo haino khvlaidi," hvnvi Jisu bono saka.

Martha bai Mariam no Jisu naimani

38 Jisu bini sagrirok bai thangte thangte kami khungchao sokphaika. Aro Martha hvnvi bvrvi khoroksa bono basuna khvlai nogo sitokka. **39** Mariam hvnvi bini bahonojvk khoroksa tongo. Mariam Jisuni yakung gana achugui bo samano khvnai tongo. **40** Yang Marthale lobo jobo khvlaina pailaijagya. Bo abo baino Jisuni thani hai hvnvi saphaika, "Porbu, kvkvi asvk samung ani sagomang phinvi tonkha. Nvng omono nugya da? Ano chubana hvnvi bono sai rvdi!" **41** Porbu hai hvnvi bono saphika, "Martha, khvnadi! Nvng samungomang khorok mihimrvi tektokhe tongo; tvmakhe nangnai manvi mungsano. Mariam abonono savi nakha, abono bini yagni kebo tlangvi manglak."

Parthona phvrngmani

11

1 Jisu sal sa kvrvngsao parthona khvlai tongmani. Parthona pavi bini sagrirogni khoroksa hai hvnvi saka, "Porbu, Johon bini sagrirogno phvrngma hai nvngbo chvngno parthona khvlaina phvrngdi." **2** Bohrogno Jisu hai hvnvi saka, "Norok ahaike parthona khvlaidi: 'Apha: Nini mung kvthar hvnvi surijakthung; nini ha phaitung. **3** Chini nangmani chamung sal brum brum rvdi. **4** Chini sumsogrogno nakardi; chini thani majra khvlainairogno chvngbo haino jotono nakaro. Chvngno ta amjogrvi. **5** Bo bohrogno hai hvnvi saka, "Romdi, hor diboro nini yar khoroksano nvng haike saika, 'Yar, mairung mochom tham rohorgradi. **6** Kvrngsao lam rvthani yar khoroksa ani aro sokphaika, yangle charvnani mungsa phano kvrvi.' **7** Phiya, bo nok bisingo tongvi sahorka, 'Ano tekto ta

rvdi. Tabuk dugar berebjak, chvraikhonairok ang bai thui tongo. Ang bachai mungsa phano rohorvi manglak.' **8** Haike ang norogno sao, yami khatila bai bachai rvyia phano, nvng koi tongma bai nangma joratvi nono bachai rohoranv. **9** Abo baino norogno ang sao: Sandi, norogno rvjaganv; naitugdi mananv; dugar budi, norogni bagvi phiyogjaganv. **10** Tamni hvnke sannai bo mano, naituknai bo nugo, dugar bunai bini bagvi phiyogjago. **11** Bvsala a sanke chibuk rvnai abo tvi bupha norogni bisingo sabo tong? **12** Ebakhe toktvi sanke sindrai rvnai sabo tong? **13** Norok borok hamyatvtvi bvsano manvi kaham rvna sio, haike bono sannairogno chugnohani Pha bvsvk kvbangmakhe Phola Kvthar rvno."

Jisu ba Belsebul bai mvtai hamya rvkhilai pho

14 Khoroksano boba khvlai tongnai mvtai hamyano Jisu rvkhilai rohoroka. Mvtai hamya ongkhorvi thangke a borok kok sachaka, hake lukurok wanajakha. **15** Borogni bisingo baksa hai hvnvi saka, "Mvtai hamyarogni bokhorok Belsebul baise bo mvtai hamya rvkhlaio." **16** Kaitor bai bo chongjak da hvnvi baksa potali navi bini mungsa svk soidom naina naikha. **17** Jisu bohrogni kha wansugma sai manvi hai hvnvi saka, "Hani bororok walavi kaglaikhe a ha bavi thango. Boniyai kaglaijak nukhungbo abo haino bavi thango. **18** Abo haino Soitanni hao borok kiching borok walavi kaglaikhe bini ha bahaike dvgvi tongnai? Ang Belsebul bai mvtai hamya rvkhlaio hvnvi norok sao. **19** Belsebul baise ang mvtai hamya rvkhlaikhe norogni bororok sabo bai rvkhilai sla? Norogni chaya hvnvi bohrok sai mannai. **20** Haiyake, ang Kaitorni phan bai mvtai hamya rvkhilai tongkha ba, norogni thani Kaitorni ha sokphaika hvnvi kha kasidi. **21** "Phan gvnang borok osororok tvi nok mvrvkhe nogni manvirok tongrvgo. **22** Phiya, bini sai phan gvnang bono kosonvi mechenphaikhe bo kha bommani osororok segvi manvirok bantakhe rvo. **23** "Ani bvkhagyakhe bo ani bailoya; ang bai thumchuruyakhe bo piring poroi khvlaio."

Mvtai hamya kiphilmani

24 "Borogni sagni onghorjak mvtai hamya ha kvrano himgurungvi bathakthai naitugrao. Ulo naitugui manlvyakhe bo bai hvnvi sao, "Ang onghorvi phaima nogo thangpiranv.'" **25** Thangpirvi bo a nogno pharjak sibjak tei bebak thiti nuguio. **26** Abo nugui bo thangvi bini sai chengta mvtai hamya te masinino ringvi tubuo. Bohrok arono habvi tongo, hake a borok svkangni sai teibo digisigi vngo."

Sabo hamchajak?

27 Jisu o kok sai tong phuru luku bisingni bvrvi masa bono hai hvnvi sotonvi saka, "Nono ogo tvinai phiya nvng chamani abuk hamchajak!" **28** Tvmakhe Jisu hai hvnvi saka, "Hai phano Kaitorni kok khvnai rakhognairokse hamchajak!"

Bui soidomni samung naina pho

29 Borok kuthumrvrvk Jisu hai hvnvi sarvrvk, "Tabukni bororok bvsvk chengta gvja! Bohrok soidomni samung naina hvno. Vngya, mungsa phano phunugjaglak; Jona phunugma simi phunugjaganv. **30** Jona Ninibirogni thani thaibol vngma hai Borogni Sajlabo tabukni bororogni thani abo haino thaibol vnganv. **31** Jerani salo ha dokhingni isiri tabukni bororok bai baksa bachaphirvi bohrogno majra beranv. Tamni hvnke Solomoni kok elema khvnana hvnvi bo haktor buchukni phaika, aile Solomoni sai oro teibo hamtor tongo. **32** Ninibirogbo tabukni bororok bai baksa jerani salo bachai bohrogno majra beranv. Tamni hvnke Jona pirma bai bohrok kha kiphilka, aile oro Jonani sai teibo hamtor tongo."

Bvsakni chati

33 "Chati phvngvi kebo hakoro hui tonya, ebakhe tvk bai kholobvi tonya. Nok bisingo habnairok pilala nugna tvikhe thopnao tono. **34** Nini mokolno bvsakni chati. Nini nasigma keplengkhe bvsak gvngangvi chvngnai; phiya nini nasigma bejuakhe bvsak gvngangvi andar vngnai. **35** Abo baino nini bisingni kvchvng andar da vngno huske tongdi. **36**

Kvrngsa phano andar kvrvikhe nini bvsak gvnangvi chvngkhe chatini hor bebagno pilala khvlai tvi nini bvsak gvnangvi abo haino chvngsai phaianv."

Pharisairok tei Kerong phrvngnairogni chayano Jisu phnmugmani

37 Jisu sabaike Pharisai khoroksa bono chana hvnvi kobokphaika, hake bo nok bisingo habvi chana achukha. **38** Chama svkang Jisuno yak suma nugya vngvi a Pharisai wanajakha. **39** Abo baino Porbu bono hai hvnvi saka, "Norok Pharisairok mairang lotano saka saka simi huo, aile norogni bvkha gvnangvi buino segnani mangse kuplung, norok asvk chengta gvja! **40** Bepotar! Bisingsi svnamnai ba phatarnibo svnamnaiya da? **41** Aboni sai mairang lota tongmano kvrvirogno rvphlaidi, hake norogni bebagno sapsutra vngnai. **42** "Aha Pharisairok! Hamya sitranai norok! Norok usundui, khundrupui tei bebak daloni chisao kaisa Kaitorno rvi tongo, yangkhe soi bus thummano tei Kaitorno hamjagmano samung nangjagya. Abohrogno khvlavino norok. omorogno khvlaithai tongmani. **43** "Aha Pharisairok! Hamya sitranai norok! Norok kuthumnogo jotoni sai kuchugo achukna naio, hatihabao bui bai khulumjagna tvijago. **44** Hamya sitranai norok! Norok simakor sijagya hai; borok sai manyai abo tvi himvi tongo." **45** Kerong phrvngnai khoroksa bono hai hvnvi saka, "Hodakra, o kok saui nvng chvngno suda lachirvsio." **46** Jisu hai hvnvi saphika, "Kerong phrvngnairok, norogbo hamya sitranai! Paima bara buini phikungo norok poja boksai simi rvo, chubana hvnvile yasi bai ervi suda naiya. **47** Hamya sitranai norok! Norogni bosongrok asvk diari butharmani norok bohrognino holong mukumu svnamo. **48** Norogni bosongrok samung hamya tangmano norok juit chajago, gosibo tongo; tamni hvnke bohrokhe diarirogno butharka, phiya norokhe holong mukumu svnamo. **49** Aboni bagvi Kaitorni elema hai hvnvi saka, 'Ang bohrogni thani diari bai titun rohoranv. Bohrok baksano butharanv, baksano satoganv.' **50-51** Abo baino sirisitini simi asvk diarirogni thvi kochogrvmani, Abelni simi nokhla bai nokthar kvcharo butharjagnai Sakariani thvini yagul, tabukni bororok bebak ma suanv. Au, ang norogno sao, tabukni bororok bebak yagul ma suanv! **52** "Kerong phrvngnairok, hamya sitranai norok! Elema nogni

surani norok yapha nai tonkha; norogbo habya, muchungnairognobo habrvya!" **53** Jisu aroni ongkhorvi thangkeno Kerong phvrngnairok tei Pharisairok bono sejalaikha, poderepod kok kutugbo svnglaikha, **54** sama chayakheno bono khvio karvna nai tonglaikha.

Phatrarogni bagvi sagriogno ragdama

12

1 Sai kvbangma borok aphuru kuthumphaika. Borok asvk bangkha yakung bai yakungse kaphigjaglai tonglaisio. Jisu bini sagriogno simi hai hvnvi sagraka, "Pharisairogni chuanni bagvi huske tongdi - abo phatramise. **2** Kholobvi tongjak phiyogjaganv, kotonvi tonjak sijaganv. **3** Abo baino norok andra gundra samano pilala khvnarvjaganv; besero tongvi khunju serek serek samano kami kami chirikhogvi sajanv."

Sabono kirina nangno

4 "Ang norogno sao, takhukrok, mangno butharvi mannairogno ta kiridi. Tamni hvnke aboni sai bara bohrok tei mungsa phano khvlai manya. **5** Sabono kirina nangno ang tabuk sanv. Kaitorno simise kiridi; bole butharma ulobo gohina khiklai mano. Au, ang sao, bonono kiridi! **6** "Chrvvi maba ba lebnvi suda vngya diba? Omorogni masano phano Kaitor pogyakho. **7** Norogni bokhorogni bebak bvkhvnai suda bini lekhajak. Abo baino ta kiridi; chrvvi kvbangmani sai phano norok hilikugo."

Luku bvsKango Khristono gosike

8 "Ang norogno sao, luku bvsKango ano gosike, Kaitorni suarirogni bvsKango Borogni Sajlabo bono gosianv; **9** phiya luku bvsKango ano gosiyake Kaitorni suarirogni bvsKango Borogni Sajlabo bono gosiglak. **10** "Borogni Sajlano kebo hamya sake bo nakarjaganv; phiya Phola Kvtharno hamya sake bo nakarjaglak. **11** "Bororok norogno kuthumnogo ebakhe alongo bus thumna bagvi sopro tubu phuru tamo saui yognai abono ta

wanadi; **12** tamni hvnke tamo sana nangno Phola Kvthar aphuruno norogno sai rvphaiav."

Gvnang bepotarni rvngthoma

13 Luku bisingni khoroksa Jisuno hai hvnvi saka, "Hodakra, apha kvlangmani sompotini ani manthai rvdi hvnvi takhukno sadi." **14** Jisu hai hvnvi saphika, "Norok kok banglaimano sachuna bagvi eba norogni sompoti bantakhe rvna bagvi sabo ano chongkha ba?" **15** Hake bo lukuno hai hvnvi saka, "Hus vngbaidi, poderepod lugurni yagni sagno rakhogdi; tamni hvnke gvnang phano vngdi, rangrirok bono mvthangphlai manya."

16 Jisu aphuru o rvngthomano bohrogno saka, "Gvnang khoroksa tongmani. Bini kheto belaikhe mai hamka. **17** Hake bo hai hvnvi wansukka, 'Ang tabuk tamo khvlainai? Asvk mai kvbangma tonato ani nok kvrv. **18** Hake samung mungsa tangsinv,' hvnvi saui bo hai hvnvi kha chongkha; 'Bebak mai tonma nogno svbavi kotorkhe tangphiranv. Arono mai kvbangmano tei asvk manvino tonanv. **19** Aphuru ang sagno hai hvnvi sanv, Bisi kvbangmani bagvi manvi kvbangma tisai narvkha. Talikha kotorsa, lenglatvtvi tabuk bisogvi chadi nvngdi, tongthogdi.' **20** Yangle Kaitor bono hai hvnvi saka, 'Svijla kvpalsa! Tinini horono nini hama mvthagjaganv. Asvk tisai narvgmarok aphuruke sabo mannai?' **21** Sagni bagvi rangmai aji gvnang vngvi Kaitorni thanile gvnangya abono a borok hai."

Kaitorni thani kha beradi

22 Bini sagrirogno Jisu aphuru hai hvnvi saka, "Abo baino ang norogno sao, tamo chai thangnai, tamo kannai hvnvi ta wanadi. **23** Chamungni sai langma torkugo, richumni sai bvsak torkugo. **24** Tokharogno nahadi: bohrok maibo sarya, rabo raya; bohrogni dingrabo kvrv, dumbo kvrv; Kaitorno bohrogno chana rvi tongo. Toksatoktvini sai norok bsvkse hilikugvi tongkha! **25** Wanau norogni bisingo sabo te sal sa ayuk phologvi man? **26** Omo hai samung kotoi manyakhe asvk manvirogni bagvi tamni

wanai tong? **27** Khumrok bahaike torlog nahadi. Bohrok samungbo tangya, ribo tagya. Hake ang norogno sao, Solomon jolma jolsa gvnang phano omorogni barsani saise asvk naithogvi manlangya. **28** Charani jabra - tini tongkhe, khvna kvrvvi, thapao sogjagnai - abono Kaitor asvk naithogrvvi tonkhe, O poito kisarok, norogno bo teibo naithogrvglak diba? **29** Abo baino chana nvngnano wanai kha ta yogrvdi. **30** Svngcharni bebak borogno omorogno naitugo. Omorok norogni samung nango hvnvi norogni Pha sai mano. **31** Omorogno khibi Kaitorni hani bagvi kaphragradi, hake a manvirogno bo norogno haino rvnv bla."

Chugnohani bagvise ajidi

32 "Ta kiridi, mera dol bangya! O hano norogno rvna hamo hvnvi norogni Pha kha chongkha. **33** Norogni. tongma joratvi phalbavi kvrvirogno rvdi. Tei champhlaiya, abo tvi rangse ajidi, hvmba paiphlaiya, abo tvi rangrise chugnohao ajihordi. Arole sikogbo khogvi manya, yongbo warvi manya. **34** Tamni hvnke rangmai tongthanino norogni bvkhabo tongnai."

Seleng tail kvrvngrok

35 "Change ri khai chati phvngvi norok tiarkhe tongdi. **36** Kailabari thangnai nokphangni selengrok dugar bukheno phiyogna bagvi buphuru nokphang phaino hvnvi nasingvi tongma hai norogbo tongdi. **37** Nokphang kiphilvi sichajak nukphaima selengrok hamchanai. Ang norogno soino sao, bo sakphang chango ri khai bohrogno achugrvvi charvanv. **38** Nokphang hor diboro phano aichuk kvrao phano phai sichajak nukphaima selengrok hamchanai. **39** Phiya omono maitu narvgdi, sikok buphuru phaino sai manmate nokphang sichai tongvi sikok habrvglakhamu. **40** Norogbo tiarkhe tongdi. Phaiglak hvnvi tong phuruno Borogni Sajla phaianv."

Kharomnai bai kharomya seleng

41 Pitor Jisuno hai hvnvi svngka, "Porbu, nvng o rvngthomano chvngno simi da sa, bebagno buda sa?" **42** Porbu hai hvnvi saphika, "Nokphang bai

nogni bebak selengrok charvna kharvna jora talaphini bagvi berjagnai abo tvi sutrang tei sian kvrung seleng sabo tong sla? **43** Nogo kiphil phuru nokphang omo hai khvlaijak nukphaima selengno hamchanai. **44** Norogno ang soino sao, bebak sompoti talaphini bagvi a selengnono nokphang beranv. **45** Phiya, 'Ani nokphang phaina lerkho bla,' hvnvi a seleng kha bising bising saui bvrvi chvla selengrogno butrvngkhe, belai chakhe nvngkhe, chuak nvngvi phegke, **46** hake phaiglak hvnvi tongmani salono, bo sai manslabya sini nokphang phainai. Hake bo bono kochognvikhe tanphainai tei kharomyarogni budulo tomiai. **47** "Nokphangni muchungma sai mantvtvise tiarkhe tongya eba bini muchungma hai khvlaiya a seleng panjalvi svpragjagnai. **48** Phiya, nokphang muchungma sai manyai svpragjagnai samung tangkhe a seleng kisicha svpragjagnai. Kvbang rvjak thani kvbang najagnai; teibo kvbang rvjak thani teibo kvbang sudi hvnjagnai."

Jisuni bagvi kaglaiimng

49 "Ang o haktoro hor sokchana phaio; angkhe tabukse khamchitung hvnvi muchungvi tongkha! **50** Ang bapsisma kaisa nana tongkho; abo vngya sak kha logvi ma tongkha! **51** Haktorni borogno kvchang kvchangkhe tonna bagvi ang phaio hvnvi da norok kha ka? Ihi, kvchang kvchangni bagviya, ang svkagnase phaio. **52** Nogo khorogba tongkhe tabukni simi kaglainai; khorognvini bebailo khaksa khoroktham, khorokthamni bebailo te khaksa khorognvi vngnai. **53** Bohrok kaglainai - bvsani bebailo bupha, buphani bebailo bvsa; bumani bebailo sajvk, sajvkni bebailo buma; kvrajvkni bebailo hamjvk, hamjvkni bebailo kvrajvk bachanai."

Molni gujok

54 Jisu lukuno hai hvnvi o kogbo saka, "Posing gla chumui kasama nukhe norok 'Watvi wanai,' hvno, wabo wao. **55** Dokhing glani nobar sibma nukhebo 'Satung tunganv,' hvno, tubo tungo. **56** Phatrarok! Nokha bai

haktorni tongmung nugui aboni gujok sai mankhe o molni gujogno norok tam vngvi sai manya?"

Walainai bai kvthanani

57 "Chamachaya norok sakphang tam vngvi soike nai manya? **58** Khoroksa rrini bebailo kok phvngvi alongo tvlangna naikhe, lamaono kvthai paina naidi. Vngyakhe bo nono sopre along sachunaini yago yapharanv, along sachunai sebukni yago yapharanv, sebuk jelo chobanv. **59** Lepsa kvrvi tvi subaiya sak nvng aroni ongkhorvi manglak."

Sumsogni kha kiphilyakhe komornai

13

1 Aphuruno luku bisingni baksa Jisuno Galilirogni magnvithamni kok saka. Kaitorni thani ratharma rvi phuru Pilat bohrogno butharvkha. **2** Jisu bohrogno hai hvnvi saphika, "Abo haike butharjagma bai bohrok tei Galilirogni sai sumsok gvnang hvnvi da norok kha ka? **3** Haiya! Ang norogno sao, sumsogni kha kiphilyakhe norogbo abo haino bebek gajjai komornai. **4** Phiya, Siloamo aok kuchuk bai sinchrebjagvi a thvinai chicharrogno norok tei Jerusalemrogni sai hamya da hvnvi kha ka? **5** Haiya! Ang norogno sao, sumsogni kha kiphilyakhe norogbo abo haino bebek gajjai komornai."

Khvichang thaiyani rvngthoma

6 Aboni ulo Jisu o rvngthomano saka, "Khoroksani angur bari khvichang phangcha tongmani. Sal sa bo bvthai khagna navi thaicha phano manlvya. **7** Abo baino bo bari mrvvgnaino hai hvnvi saka, 'Naidi, nokha bisi tham kai thangka, khagna navi o buphangni bvthai manphaiya. Tanvi khibichidi! Tam vngvi hudahudi bo oro ha tos kusubui tongjagnai?' **8** Bari mrvvgnai hai hvnvi si phika, 'Nokphangsa, taklai bisa tongradi. Ang yaphango chogvi phas rvi naianv. **9** Khali thaike ba kahamno, vngyakhe tanvi

khibidi.' "

Sabbat salo kompi masano Jisu hamrvmani

10 Sal sa Sabbat salo kuthumnogo Jisu phrvngvi tongmani. **11** Are mvtai hamya kolobjagvi bvrvi masa nokha bisi chichar kompi vngvi tongkha. Abo baino bo guji khachukka, kisicha phano keplengkhe bachai manya. **12** Jisu bono ringvi hai hvnvi saka, "Bvrvima, nvng o bemuni yogkha." **13** Hai hvnvi bo bono tangkheno kepleng vngvi bachai Kaitorno lobkha. **14** Sabbat salo Jisu hamrvma bagvi kumumnogni hoda jolijagvi lukuno hai hvnvi saka, "Samung tangna bagvi nokha sal dok tongo. Aphuruse hamrvjakphaidi, Sabbat saloya." **15** Hake Porbu bono hai hvnvi saka, "Phatra. rok! Sabbat salo musukno eba koraino guai nogni khengvi tvi kharvna bagvi tvlangya, abo tvi borok norogni bisingo sabo tong? **16** O bvrvimano bo Abrahamni bvsajvkno bla. Soitan bono nokha bisi chichar kolobvi tongkha. Haike Sabbat salo bono Soitanni yagni phiyogmani chajaglvya diba?" **17** Bini o kok bai bebailni bororok lachi kothroka, phiya bebek lukurokhe bini asvk wanamasingcha samung nugui tongthogjagbaikha.

Biriphang bvchlviini rvngthoma

18 Jisu aboni ulo hai hvnvi saka, "Kaitorni ha bubo tvi? Tamo bai bono sunai? **19** Omo biriphang bvchlvi haise. Borok khoroksa abono bini bari kaikha. A bvchlvi achavi torvilogvi buphang vngkha. Hake toksatoktvirok bini bedego bothop thumka."

Chuanni rvngthoma

20 Jisu hai hvnvi te waisa saka, "Kaitorni hano ang tamo bai sunai? **21** Omo chuan haise. Bvrvi masa omono mai balingsao dalogvi rvmale bebek maise lomvi thangka."

Dugar kesep

22 Kamirogo, taunrogo phvrngtvtvi Jisu Jerusalem bvkhak himvi tongkha. **23** Khoroksa bono hai hvnvi svngka. "Hodakra, rangma mannairok bangthayana na?" Jisu bohrogno hai hvnvi saka, **24** "Dugar kesep tvino dundrogvi habna naidi. Ang norogno sao, borok kvbangma habna nai phano manglak. **25** Nokphang bachai dugar berebvi paikhe, norok aphuru phataro bachai dugar bui hai hvnvi sai tonganv, 'Nokphangsa, dugar phiyogdi.' Bo hake hai hvnvi saphiranv, 'Norok buroni ang sai manya.' **26** Norok aphuru hai hvnvi saphiranv, 'Nvng bai chvng chakha nvngkha, chini kamio nvng phvrngphaika.' **27** Bo te waisa hai hvnvi sawanv. 'Norok buroni ang sai manya. Ganani thangdi, chengtarok!' **28** Abraham, Isak, Jakob tei diarirogno norok Kaitorni hao tongma nuganv, phiya norokhe phataro bacharvi tonjaganv. Aphuru norok kabanv, wathai sekeranv. **29** Utur, dokhing, pub, posingni bororok Kaitorni hao panda achukphaianv. **30** Aphuru, naidi, tabukni uklogrok svkang vnganv, phiya svkangrok uklogo tongrvaganv."

Jerusalemno Jisu hamjagmani

31 Aphuruno Pharisai magnvitham Jisuni thani phai hai hvnvi saka, "Nvng oroni ongkhorvi thangdi, Herod nono butharna nai tongo." **32** Jisu bohrogno hai hvnvi saka, "A sialsano saidi, 'Tini bai khvna ang mvtai hamya rvkhlainai tei hamya hamrvnai, sal thamni salo ani samung painai.' **33** Ani lamao ang ba tinibo, khvnabo, sonibo ma himnai; Jerusalemno khibi diari burorogo butharjaganv abo vngvi manya. **34** "O Jerusalem, Jerusalem! Diarirogno nvng butharo, nini thani Kaitor bai rohorjagnairogno hadul khitaro. Tokma bvkrang tola toksarogno thumui tonma hai ang bsvkse nini borogno yak kvbagvi tonna naikha - nvng khvlairvlvya. **35** Tabuk norogni nok khibijaganv. Ang norogno sao 'Porbuni mungvi phainaino Kaitor bor rvthung,' hvnvi saya sak norok ano tei nuglak."

Bemu gvnangno Jisu hamrvmani

1 A Sabbath sal sa Jisu Pharisairogni hodani nogo kobogjagvi chana hvnvi thangka; hake aroni bororok Jisuno naichomvi tongkha. **2** Aphuru khoroksa dujak Jisuni bvskango phaika. **3** Hake Jisu Kerong phvrngnai bai Pharisairognno hai hvnvi saka, "Sabbat salo bemu hamrvi mano hvnvi chini Kerong saya diba?" **4** Bohrok thaicha phano salvya. Jisu a borogno samo naharvi hamrvi rohorka. **5** Hake bo bohrogno hai hvnvi saka, "Norogni khoroksa svkni bvsala eba musuk phano Sabbath salo tvikhoro kvlaikhe, Sabbath sal hvnvi bono logi logino khochaglak norogni bisingo abo tvi sabo tong?" **6** Bohrok o kogni thaicha phano saphirvi manlvya.

[Nograi bai nokphaogno phvrngmani](#)

7 Jisu khelke nai ba nograi magnvitham khamplai kuchuk nai achugo. Abo baino bo o rvngthoma bebagno sai khvnarvkha. **8** "Khoroksa svk nono kailabari chana kobokhe khamplai kuchuk nai ta achugdi. Tamni hvnke nini sai phano borok kaham kobogjagna tongo. **9** Hake norok khorogvino kobognai nokphang nono hai hvnvi saphaianv, 'Bono o khamplaino rvdi.' 'Aphuru nvng lachi kothronai, khamplai hacherobo ma achugnai. **10** Haiya, kobogjagvi thangke khamplai hacherose achugdi. Hake nokphang nono hai hvnvi saphaianv, 'Khamplai kuchugo bachai phaidi, takhuk.' Aphuru bebak nograirogni bvskango nini mvkhangse chvngnai. **11** Tamni hvnke kotor sadinai bo kusu svnamjagnai; phiya kotoi sadinai bo kotor svnamjagnai." **12** Bono kobognaino Jisu hai hvnvi saka, "Nvng panda khvlaike, aro nini yar, takhuk, sandai eba noksanokari gvnangrogno ta kobogdi - vngyakhe bohrok nono kobokphirvi yagul suanv. **13** Nvng panda khvlaike, aboni sai bigra, kompa, khora, kanarognose kobogdi. **14** Haike nvng hamchanai; tamni hvnke bohrogle nono yagul suphirvi manya bla. Borok kahamrok mvthangvi bacharvjak phuru nvng omoni yagul sujaganv."

[Kaitorni hani pandani rvngthoma](#)

15 Aroni khoroksa achugjak abono khvnai Jisuno hai hvnvi saka, "Kaitorni hani pandao achugui mannairok bvsvk hamchanai borok!" **16** Phiya, Jisu bono hai hvnvi saka, "Borok khoroksa panda kotor khvlai borok kvbangma kobokha. **17** Chana vngkhenno selengno rohorvi bo kobogmarogno hai hvnvi sarvhorka, 'Phaichidi, bebek vngbaikha.' **18** Tvmakhe bohrok bebagno dalsake samung kisilvi phunukka. Khoroksa svkang hai hvnvi saka, 'Ang kheto paika, hake thangvi abono ma naianv; ano yakarjabadi.' **19** Te khoroksa hai hvnvi saka, 'Ang musuk jorba paika, hake abohrogno potali naina bagvi ang lam rvkha; ano yakarjabadi.' **20** Te khoroksa hai hvnvi saka, 'Ang kajagpaidorop, aboni bai thangvi manglak.' **21** Hake seleng kiphilvi phavi nokphangno omorogno bebek saphaika. Nokphang jolijagvi hai hvnvi saka, 'Dodi, taunni lama jangalni bigra, kompa, kana tei khorarogno tubui phaidi.' **22** Svrapasa tongvi seleng hai hvnvi saphaika, 'Nokphangsa, nvng dagi tvi khvlaijakha, teibo khamplai bara tongkho.' **23** Hake nokphang selengno hai hvnvi saka, 'Thangdi, lama jangalrogni jemantvi bebagno sopra tubui nok supungphaidi. **24** Ang norogno sao, a kobogjagnairok khoroksa phano ani o pandani bahai manglak.' "

Sagri vngnakhe

25 Luku kvbangma Jisuni logi thangvi tongkha. Jisu bohrogni bvkhak uphilvi hai hvnvi saka, **26** "Ani thani phavi buma bupha, bihik bvsa, takhuk bukhuk, phiya sagno suda khibiyakhe bo ani sagri vngvi manya. **27** Sagni kurusno balvi ani uklogo phaiyake bo ani sagri vngvi manya. **28** Norogni bisingo khoroksa svk nok kuchukkotorkhe tangnakhe bo a samung painani rang da parino hvnvi wansugui lekhangranai. **29** Vngyakhe nokthai simi lubavi a nogno pai manyake joto nugnairok bono hai hvnvi saui mvvnvai, **30** 'O borok cheng hvnvile chengkha, paise manlvya.' **31** Ebakhe bagra khoroksa svk sengkvrak sai chi twi te khoroksa sengkvrak sai khol tvijak bagra bai choba nangma svkang bo pa da paino hvnvi wansugui naigranai. **32** Payani antaske a bagra hachalo tongsanino bo kvthana salaina bagvi titunrogno rohornai. **33** Haike tongma joratvi

khibiyakhe norogni bisingo ani sagri vng mannai kvrvi."

Samung nangya som

34 "Som manvi kahamno, phiya bini pabma kvmakhe abono bahaikese pabrphina? **35** Abo khetobo samung nanglvya, nogbrabo samung nanglvya; phatarose khibijaksinai. Khunju tongkhe ba khvnadi!"

Mera kvmanaini rvngthoma

15

1 Sal sa brindiarok bai basijagrok kvbangma Jisuni kok khvnana phaika. **2** Pharisairok tei Kerong phrvngnairok hunuhanaike hai hvnvi salaika, "Basijagrogno basiyai o borok bohrok bai tonglaio chalaio!" **3** Hake Jisu bohrogno o rvngthoma saka, **4** "Romdi, norogni bisingo khoroksani mera rasa tongo. Aboni bisingo masa kvmakha - bo tabuk tamo khvlaino? Bo te kholpebrvi-chisukuno panthoro kvlangvi a masano manya sak naituguinai. **5** Bo abono mankheno belai tongthogjagvi bini gvdnao tisaka. **6** Nogo tubui bikichingsongno, noksanokarino ringhorvi hai hvnvi saka, 'Norogbo ang bai baksa tongthogdi. Tamni hvnke ani mera kvmamani ang manphika.' **7** Ang norogno sao, abo haikeno kholpebrvichisuku kahamrok kha kiphilna nangyarogni sai sumsok gvnang khoroksa kha kiphilnaini bagvi chugnohao belai tongthogjagnai."

Rang kvmanaini rvngthoma

8 "Ebakhe ba romdi, bvrvi khoroksani rang khokchi tongo. Aboni bisingo khokcha kvmakha - bo tabuk tamo khvlaino? Bo chati phvngvi, nok pharvi abono manya sak kahamke naitugnai. **9** Bo abono mankheno bikichingsongno noksanokarino ringhorvi hai hvnvi saka, 'Norogbo ang bai baksa tongthogdi. Tamni hvnke ani rang kvmamani ang manphika.' **10** Ang norogno sao, abo haikeno sumsok gvnang khoroksa kha kiphilke Kaitorni suarirok tongthogjago."

Maia gvnang bnphani rvngthoma

11 Jisu o rvngthomabo saka, "Borok khoroksani bvsala takhuk nvi tongmani. **12** Bvsala kusu buphano hai hvnvi saka, 'Apha, ani manthai sompoti ano tabuk rvd.' Hake bupha bvsala kusuno sompoti bantakhe rvkha. **13** Sal nvitham ulokheno bvsala kusu bini banta sompoti phalbavi rang tvlangvi nogni ongkhorvi te kvrvngsa hachalma hao thangka. Aro bini rangrogno hanang pinangkhe svbai khibibaikha. **14** Bini mungsa kvrvvi tvi bo svbaibaikha. Aphuru a ha gvnangvi belaikhe chacharara nangkha; hai vngvi bo bigra khaka. **15** Bo a hanino khoroksani aro samung naikha. Nokphang bono wak mrvvngna bagvi charao rohorka. **16** Wakrogno chamungno chauvi bo ok pungna muchungjago; kebo bono chamung rvyva. **17** Ulokhe bo sichauvi wansugui kha bising bising saka, 'Aphani asvk selengrok chase chabaya, nvse nvngbaya, ang oro ma chaya ma nvngya thvina nai ma tongo. **18** Aphani aro thangphirvi ang hai hvnvi sainai, 'Apha, ang Kaitorni thani sumsok khvlaika, nini thanibo khvlaika. **19** Ang nini nvsala hvnjagnani chuglvya; anobo khoroksa nini seleng khvlaidi.'" **20** Abo haikhe bo buphani aro kiphilvi phaika. "Nok gana sogvitvtvi phuru bupha bono nuhurvi khairogjakha, kachigvi thangka, kvbagvi motom suika. **21** Hake bvsala buphano hai hvnvi saka, 'Apha, Kaitorni thani ang sumsok khvlaika, nini thanibo khvlaika. Ang nini nvsala hvnjagnani chuglvya.' **22** Bupha selengrogno hai hvnvi dagikha, 'Kan kaham chum kaham tubui bono dakti kanrvphaidi chumrvphaidi; yasio yastem sorai rvd, yakungo yaklab karvi rvd. **23** Waksaf kvphung masa tubui rathardi. Tabuk tongthogvi chalai nvnglai vngnai! **24** Tamni hvnke ani o bvsala thvi thangmase tabuk thangchaphika; kvmai thangmase manjakphika.' Hake khapang svrangvi chana chenglaikha. **25** "Aphuru bvsala okra kheto. Bo kiphilvi phai phuru nok ganao sokphaitvtvikheno rvchabmung musubmung khvnahorka. **26** Bo seleng masano ringvi hai hvnvi svngka, 'Aro tamo vnglai?' **27** Seleng bono hai hvnvi sai khvnarvkha, 'Nini nvphaiung kiphilvi phaika. Bono kaham kvrvngkhe kiphilvi manma bagvi nini nvpha waksa kvphung masa ratharka.' **28** Hake bvsala okra belai jolijagvi nogo habna soilvya. Abo baino bupha phavi bono nogo habrvna koikha. **29** Bo

buphano kiphilvi hai hvnvi saka, 'Naidi, bisi brum brum ang seleng haike nini samung tangvi tongo. Nini kok thaicha ang sal sa phano baryakho. Nvng ano tamo rvkha? Yar bayabrok bai ratharvi chalaina hvnvi aile punsa masa phanose rvtiya. **30** O nini nvsalale khanki bvrvirok bai tongvi sompoti svkvmmai khibika. Tabuk bo nogo phaimale waksa kvphung masa ratharsokchio!' **31** Hake bupha hai hvnvi saphika, 'Sajla, nvngle nogo mang tongnai bla. Ani mungsa kvrvvtvi manvi nini mangse. **32** Aboni bagvi rvchabthai musubthai tongthokthai ma tongo, nini nvphaiung thvi thangmase thangchaphika; kvmai thangmase manjakphika.' "

Sian kvrvng menajar

16

1 Jisu bini sagrirogno hai hvnvi saka, "Gvnang khoroksani menajar khoroksa tongmani. Menajar rangrok hanang pinangkhe svbai tongkha hvnvi a gvnangno khvnaryjakha. **2** Hake bo menajarno ringvi hai hvnvi saka, 'Nini mungvi abo tamo khvna? Tubudi, bsvvk svbaikha svbaiya ani thani bebak buj rvphaidi. Nono menajar khvlai tei narvglvya.' **3** 'Bubagra ano tei samungo narvglvya hvno,' hvnvi menajar kha bising bising hai hvnvi saka, 'Ang tabuk tamo khvlainai? Ha tannabo ani phan kvrvvi, birnakhebo lachio. **4** Hake tabuk samung mungsa tangany; a samung thang phano bui ano nogo ma tonna tvi khvlaiianv.' **5** Hake bo bubagrani thani lakai gvnangrogno khoroksa khoroksake ringrvhorka. Bo svkang phainaino hai hvnvi svngka, 'Bubagrani thani nini lakai bsvvk tong?' **6** 'Mon rasa thok,' hvnvi bo saka. Menajar bono hai hvnvi saka, Achugdi. Hi, nini buj, oro dakti kholpenvichi svidi.' **7** Bo te khoroksano hai hvnvi svngka, 'Nini lakai bsvvk tong?' 'Dingra rasa mai,' hvnvi bo saka. Menajar hai hvnvi saka, 'Hi, nini buj, oro kholpebrvi svidi.' **8** Menajar peret sian kvrvngni samung tangkha hvnvi bubagra bono bakheneka. O svngcharni bororok svngcharini samungo kvchvng manjagrogno sai sian kvrvngkuk." **9** Jisu hai hvnvi sai tongkha, "Aboni bai ang norogno sao, rangri pai thangvibo ayang masingo thviyani hao tongvi manvina tvikhe o

svngcharini rangri bai bayab khadi. **10** Samung kotoio jaichanai bo samung kotorobo jaichao; phiya samung kotoio jaichayakhe bo samung kotorobo jaichaya. **11** Hake norok svngcharini rangri twi chokoi phokoike sabo kha sutrangkhe manvi kahamno norogni yago tonnai? **12** Buini manvino chokoi phokoi khvlaike norogni manvino norogno sabo rvnai? **13** "Jesa seleng phano borok khorognvini seleng khati manya? khoroksano naislekhe te khoroksano hamjagnai, ebakhe khoroksano kha souike te khoroksano musunai. Nvng Kaitorni seleng khatitvtvi rangrini seleng khati manya."

Jisu sarnani thainvitham

14 Rangrio mokol chvngnai Pharisairok Jisuni o kogrok khvnai bono lengaikha. **15** Hake Jisu bohrogno hai hvnvi saka, "Norok borogni bvsakango sagno akhini borok kahamke phunuksatiro, aile Kaitor norogni bvkha sai mano. Borogni mokolose kaham, Kaitorni mokolo selengmasingcha. **16** "Baptisma rvnai Johonni jora tvino Musini Kerong bai diarirogni kok nangvi tongo; aphuruni simi Kaitorni hani hamthoma pirjagrvrvkha, hake jotono dundrogvi aro habvi phairrvkha. **17** Nokha bai haktorse kvmai mananv ba Kaitorni Kerongni biphiring kolsa phano kvmaglak. **18** "Hikno kagvi te khoroksa bvrvi nanai bo lupchase; kagjak bvrvinno nanai bobo haino lupcha."

Gvnang bai bigrani rvngthoma

19 "Gvnang khoroksa tongmani. Bo richum jilijalak kano, sal brum brum tongthok chathokke tongo. **20** Lasar hvnvi khoroksa bigra a gvnangni nuka tongphaio. Bini bvsak gvnangvi kvsamang. **21** A gvnangni maihanta bara khibi rvjagmano chauino bo bohok kvchang rvna naijao. Svirok sudase bini kvsarogno svlakphaio. **22** A bigrasa thvike suarirok bono Abrahamni gana tvlangkha. Sal sa a gvnangbo thvi phobjakha. **23** Bo ayang masingo panjalvi satogjagvi bokhorok tisai nahaka; bo hachalo Abrahamno nuhuka, Lasarnobo bini gana nuhuka. **24** Bo hake chirikhogvi hai hvnvi saka, Apha Abraham, ano khairogjabadi! Lasarno ani thani

rohordi, yasichugo tvi chomsai bo ani bvslaino kvchang rvthung. O horo ang belai satogjagvi tongkha!' **25** Abraham hai hvnvi saka 'Chvlasa, maitukhe naidi, ayang masingo tong phuru nvng bsvske kaham tongbukha; o Lasar abo haino bsvsk hamya bisingo tongbukha. Aboni bai bo oro tabuk kahamke tongo, nvngkhe satogjagvi ma tongo. **26** Hai phano norok bai chini kvcharo gohina kuthuk tongo. Abo baino oroni jesa phano norogni aro thangnabo thangna manya, phiya norogni aronibo oro phai manya.' **27** Hake a gvnang hai hvnvi saka, Apha, hake ang kojiao, ani phani nogo Lasarno rohorjadi. **28** Aro ani tei takhuk ba tongo. Bohrok oro satogjakphaiya tvikhe bo thangvi huske rvithung.' **29** Abraham hai hvnvi saka, 'Nini takhukrogno hus khvlaina bagvi Musi bai diarirok tongo; bohrogni kogno bohrok khvnatung.' **30** Bo hai hvnvi saphika, 'Thi, Apha Abraham, bohrok khvnaglak! O kvthvini hani khoroksa svk bohrogni thani thangkese bohrok sumsogni kha kiphilanv.' **31** Abraham bono hai hvnvi saka, 'Musi bai diarirogni kok bohrok khvnayakhe, kvthvini hani khoroksa svk thangvi bachaphi phano bohrok hus vnglak.' "

Sumsogni kok

17

1 Jisu sagrirogno hai hvnvi saka, "Sumsogo khiklainai belogma phase phainai; tvmakhe je belognai bo hamya sitranai! **2** Borok basrarogni khoroksano phano belogya sini bono tota holongdap khau tvirango khiklai rvmase hamkugo. **3** Sagno huske tongdi!"

Nakarmani kok

"Nini takhuk sumsok khvlaike bono khoraidi, phiya bo kha kiphilke nakardi. **4** Nini thani bo salo waisini sumsok khvlaike, phiya 'Ang kha kiphilka,' hvnvi waisini saphaike nvng bono ma nakarthai kvlaio."

Poitoni kok

5 Chonghorrok Porbuno hai hvnvi saka, "Chini poitono ragrvdi." **6** Porbu hai hvnvi saphika, "Horua bvchlvi svk phano norogni poito tongkhe o letok buphangno 'Phuichajagvi tvirango kajjagvidi!' hvnke bo norogni kok khvnanai."

Selengni khvlaithai

7 "Romdi, norogni khoroksani seleng masa tongo. Bo al chuai pavi eba musuk mvrvgbavi nogo kiphilma logino a nokphang bono hai hvnvi sa da sano, 'Hi, pkaidi, mai chaphaigradi?' **8** Ihi, sanaika dla! Bo hai hvnviise sanv, 'Ang chanani songradi; ang chabaiya sak chango rituku khau mamui bogdi! Aboni ulo nvng chadi.' **9** Seleng kok khvnamasing bai bo bono doinobad da rvno? **10** Katsvi abo haino norogno hvnma tvi bebak khvlaima ulo hai hvnvi sadi, 'Chvng basra seleng; chini khvlaithai simi chvng khvlaika.' "

Jisu biadi chajak makchino hamrvmani

11 Jerusalemo thangtvtvi Jisu Samaria bai Galili amchoini kvchar tvi thangka. **12** Kami khungchao sokphai phuru biadi chajak makchi bini phasing phaika. Bohrok hachalo bachai **13** chirikhogvi hai hvnvi saka, "Hodasa Jisu, chvngno khairogjabadi!" **14** Jisu bohrogno nugui hai hvnvi saka, "Thangdi, ochairogno phunuguidi." Hake thangtvtvi bohrok hamka. **15** Bohrogno bisingo khoroksa sagno hamma nukheno Kaitorno sotonvi lobtvtvi kiphilvi phaika. **16** Bo Jisuni yakungo pvtabkhe bolokhogvi bono doinobad rvphaika. Bo Samariani borok. **17** Hake Jisu hai hvnvi sachaka, "Khorokchino hamrvka bla, tei khoroksuku biyang? **18** O buidisi simise Kaitorno lobphaichio, te kvrvikha da?" **19** Hake Jisu bono hai hvnvi saka, "Bachadi, thangchidi; nini poito nono hamrvka."

Kaitorni ha phaimani

20 Kaitorni ha buphuru phainai hvnvi Pharisairok magnvitham o svngmano kiphilvi sathani Jisu bohrogno hai hvnvi saka, "Kaitorni ha

phang phang nugjagvi phaiglak. **21** Abo baino khoroksa phano hai hvnvi saglak, 'Iko, nahadi, Kaitorni ha orose!' ebakhe 'Urose!' Ahaiya, Kaitorni ha ba norogni bisingose." **22** Aboni ulo Jisu bini sagrirogno hai hvnvi saka, "Omo tvi sal phaianv Borogni Sajlani mol sal sa phano naina muchungvibo norok nuglak. **23** A phuru bororok norogno hai hvnvi sawanv, 'Uko urose!' ebakhe 'Iko orose!' Tongdi, naina hvnvi ta thangdi. **24** Nokha philik phuru yaphang buchuk jiliksa vngma hai Borogni Sajlabo bini salo abo haino jiliksanai. **25** Tvmakhe bo panjalvino satogjagna nangranai, tabukni bororok bai norjagna nangnai. **26** Noani phuru vngma haino Borogni Sajlani phurubo vngnai. **27** Noa rungtoro kasaya sak tvi lomvi bebagno gojob vngbaya sini bororok chalaio nvnglaio, kajaglaio kailaio. **28** Lotni phuru haino aphurubo vngnai. Jotono chalaio nvnglaio, pailaio phalaio, khul mai sarlaio borlaio, nokhuk tanglaio. **29** Lot Sodomni ongkhorvi phaima salo nokhani hor bai gvndvkni watvi wauvi bebak gojob vngbaikha. **30** Borogni Sajla nugjakphai phurubo katsvi abo haino vngnai. **31** "A salo nukaf tongnai bo noksingo bini manvirok naina hvnvi ta hapchitung; abo haino kheto tongnai bo nogo kiphilvi ta phaichitung. **32** Lotni bihikni kogno muitukhe naidi! **33** Sagni langmano narvkna nainai bo abo kvmajagnai; phiya langma kvmajagnai bo abono narvknai. **34** Ang norogno sao, a horo borok khorognvi chuki khungchao thui tongkhe khoroksa tvlangjagvi te khoroksa kvlangjaganv. **35** Bvrvi khorognvi mai suglai tongkhe khoroksa tvlangjagvi te khoroksa kvlangjaganv. **36** Kheto borok khorognvi tongkhe khoroksa tvlangjagvi te khoroksa kvlangjaganv." **37** "Buro vngnai, hodakra?" hvnvi sagrirok bono svngke bo hai hvnvi saphika, "Kvthvi tongmariino sikuruk kuthumo."

Randijvk bai along sachunaini rvngthoma

18

1 Bohrok kha baiyai parthona khvlaimang tongthung hvnvi Jisu aphuru bohrogno phvrngna bagvi o rvngthoma saka. **2** "Taun khungchao along sachunai khoroksa tongmani. Bo Kaitornobo kiriya, borognobo sak

nangya. **3** A taunono randijvk khoroksa tongo. Bo bini thani hai hvnvi koiphaimang tongo, 'Ano svbangjagmano bailkhe sachui rvdi!' **4** Udamsale bo a randijvkno kiphilvi rohorgrakha; ulo kha bising bising hai hvnvi wansukphika, 'Ang Kaitornobo kiriya, borognobo sak nangya phano, **5** o randijvk ano tekto rvi tongphaima bai bo svbangjagmano bailkhe sachui ma rvthai; vngyakhe bo phaimang tongvi ano tekto rvi lengrvnai!' " Porbu teibo hai hvnvi saka, **6** "A kha sitra along sachunai tamo saka khvnadi. **7** Haike tabuk, Kaitorni chongjagrok bini thani hopung sapung koinenekhe koimang tongkhe bo bohrogno bailkhe sachui rvglak diba? Bo omono khvlainani le da lemo? **8** Ang norogno sao, bo daktino bohrogno bailkhe sachui rvnai. Phiya Borogni Sajla o haktoro kiphil phuru bo poito gvnang borok do nukphaino?"

Pharisai bai brindiani rvngthoma

9 Sagno simi kaham hvnvi kha kaui tei asvk borogno gvnda khvlaiyarogno Jisu o rvngthomano saka. **10** "Borok khorognvi parthona khvlaina hvnvi noktharo thangmani; khoroksa Pharisai te khoroksa brindia. **11** A Pharisai bachatvtvi kha bising bising hai hvnvi parthona khvlaika, 'O Kaitor, nono doinobad, ang bui hai phemlognaiya, tatalya, lupchaya; nono doinobad, ang u brindia hai buya. **12** Ang sapta wainvi ubas tongo, ani ajimani chisao kaisa nono rvi tongo.' **13** Phiya a brindiakhe kisa hachalo bachajak, nokhacha naisana suda naisaragya, khaklab simi bui hai hvnvi sai tongjasio, 'O Kaitor, ano, sumsok gvnangno khairogjabadi!' **14** Ang norogno sao," hvnvi Jisu hai hvnvi saka, "O borokse Kaitorni thani kaham vngvi nogo kiphilka, a Pharisaiya. Kotor sadinai bo kotoi svnamjagnai, phiya kotoi sadinai bo kotor svnamjagnai."

Chvrairogno Jisu hamjagmaui

15 Baksa borok chvrairognobo Jisuni thani tubukha bo bohrogno tangthung hvnvi. Sagrirok abono nugui ta tubudi hvnvi bohrogno hvnka. **16** Tvmakhe Jisu chvrairogno ringvi sagrirogno hai hvnvi saka, "Chvrairogno

ani thani phairvdi, ta kasudi; bohrok tvi borogni bagvino Kaitorni ha. **17** Ang norogno soino sao, jesa phano chvrai haike Kaitorni hano kha chobyakhe bo aro habvise manya."

Gvnang bai Kaitorni ha

18 Judairogni bokhorok khoroksa Jisuno hai hvnvi svngka, "Hoda kaham, thvinyani langma manna bagvi ang tamo khvlaina nangno?" **19** "Nvng tam. vngvi ano kaham hvn?" hvnvi Jisu bono svngphirvi hai hvnvi saka, "Kaitor simise kaham, te khoroksa phano kaham kvrvvi. **20** Nvng kerongdagimano sai mano: 'Lupcha ta vngdi, borok ta buthardi, ta khogdi, jera tatal ta sadi, buma buphano suridi.'" **21** A borok hai hvnvi saphika, "Chvraiphang sinino ang omorok bebagno rakhogvi phaika." **22** O kok khvnaui Jisu.bono hai hvnvi saka, "Tabuk phano nini te mungsa khvlaijagnai tongkho. Nini tongma joratvi bebak phalbavi kvrvirogno rang hadirvdi. Hake chugnohao nini rang khatijaganv; omo khvlaibaikhe ano rvktharphaidi." **23** A borok abono khvnaui belai kha thvijakka, tamni hvnke bole svnamvi gvnang bla. **24** Kha thvijagma nugui Jisu bono hai hvnvi saka, "Gvnangrok Kaitorni hao habnani bsvvk kutuk! **25** Suchi bvlam tvi maiungf habnase laianv ba, Kaitorni hao gvnang habnani asvk laiglak." **26** O kok khvnanairok bono hai hvnvi hvnka, "Hake sabo rangma mannai sla?" **27** Jisu hai hvnvi saphika, "Borok khvlai manyano Kaitor khvlai mano." **28** Hake Pitor hai hvnvi saka, "Naidi, chvng nokhuk khibibavi nono rvktharphaika." **29** Jisu hai hvnvi saka, "Ang norogno soino sao, Kaitorni hani bagvi nokhuk, hiksa, taitakhuk, bumabupha, chvraikhonaino khibinai **30** bo o molo bekulkhe phiya phainai molo thvinyani langma mannai."

Bini thvinani kogno Jisu mobaikhe waitham samani

31 Jisu sagri chignvino tepsa tvlangvi hai hvnvi saka, "Khvnadi, chvng tabuk Jerusalemo thangnai; arono Borogni Sajlani bebak kok diarirok svilangma haino soike nangphainai. **32** Judaiyarogni yago bo yapharvi rohorjagnai; bohrok bono lengainai, chengdula thvngnai, phiya khuktvi

musunai. **33** Bohrok bono svpragnai, butharnai, tvmakhe bo sal thamni salo thangvi bachaphinai." **34** Sagrirok bo samano mungsa phano romvi manlvya. A kogni gujok hui tonjakha, abo baino Jisu tamo saka bohrok sai manlvya.

Bigra kanano Jisu nugrvntani

35 Jisu Jerikho gana sokphai phuru bigra kana khoroksa lama gana achugui birvi tongmani. **36** Borok kvbang himma sari khvnaui a bigra "Abo tamo?" hvnvi svngka. **37** Bohrok bono hai hvnvi saka, "Nasaretni Jisu phaio." **38** Hake bo chirikhogvi hai hvnvi saka, "O Jisu! Daudni Sajla! Ano khairogjabdi!" **39** Bvskangni bororok ta kutugdi hvnvi damorogrvrk bo teibo sotonvi chirikhogvi hai hvnvi sarvrk, "O Daudni Sajla! Ano khairogjabadi!" **40** Jisu abo baino bathagvi a kanano tubudi hvnvi dagikha. Bo gana phai phuru Jisu hai hvnvi svngka, **41** "Nvng tamo nai? Ano tamo khvlaidi hvn." "Hodakra, ang nukphina muchungo," hvnvi bo saphika. **42** Hake Jisu bono hai hvnvi saka, "Nugdi! Nini poito nono hamrvka." **43** Bo aphuruke doropsa nukha, hake Kaitorno lobtvtvi Jisuno rvktharka. Asvk lukurok abono nugui Kaitorno lobkha.

Jisu bai Sakkai

19

1 Jisu Jerikho habvi abo tvi himvi tongmani. **2** Aro brindia bokhorok Sakkai hvnvi khoroksa gvnang tongmani. **3** Jisu sabo hvnvi naina kaphrauibo lukoboinani bai asvk borogo bo nuhulvya. **4** Bo hake asvk borok bvskang tvi khachigvi Jisu phaima lamao bono naina hvnvi khvichang buphango kasaika. **5** Jisu aro sokphai phuru naisau Sakkaino hai hvnvi saka, "Sakkai, dakti ongkhorvi phaidi; ang nini nogo tini ma tongvinai." **6** Bo dakti ongkhorvi tongthogjagvi Jisuno boriphaika. **7** Abono nugnairok bebagno hunuhanaike hai hvnvi salaika, "Basijagni nogose o borok tongna hvnvi thango!" **8** Yangkhe Sakkai bachai Porbuno

hai hvnvi saka, "Hodakra, naidi, ani jetongmani khaksa ang kvrvirogno rvnv. Ang khoroksa svkno phemlogma tongkhe waibrvi bono suphiranv."
9 Jisu bono hai hvnvi saka, "O nogo tini rangma sokphaika; o borogbo Abrahamni bosongni. **10** Borogni Sajla kvmanairogno naitugui mvthangna phaio."

Rangchagni rangni rvngthoma

11 Bo samano khvnanairogno Jisu rvngthoma thaicha saka. Bo Jerusalemo sokphaitvtvi vngma baise Kaitorni ha tabukno nugjagnai hvnvi bororok wansukka. **12** Abo baino bo hai hvnvi saka, "Borok kotor khoroksa bagra charvjagvi kipphilna hvnvi kvrvngsa ha hachalo thangka. **13** Kutulvi thangna phuru bo seleng makchino ringvi rangchagni rang khokcha khokchake rvi hai hvnvi sai kvlangkha, 'Ang kiphilvi phaiya sak omo bai bsvsk bepar thvngvi man thvngsogdi.' **14** Yangle bini hani bororokhe bono naislejago. Abo baino bo kutulma ulo bohrok titunrok rohorvi hai hvnvi sarvhorka, 'O borok chini bagra vngthung chvng abo naiya.' **15** "A borok bagra charvjagvi kipphilvi phaika. Phaikeno rang kvlangmani selengrogno sabo bsvsk ajisokka sai manna bagvi ringdi hvnvi dagikha. **16** Khoroksa svkang hai hvnvi saphaika, 'Hoda, nvng kvlangmani khokcha bai ang khokchi ajisokka.' **17** Bo hai hvnvi saka, 'Kaham khvlaika, nvng seleng kaham! Samung kotoino kharomvi tangma bai nvng taun khungchini bokhorok vngdi.' **18** Te khoroksa hai hvnvi saphaika, 'Hoda, nvng kvlangmani khokcha bai ang khogba ajisokka.' **19** Bo bono hai hvnvi saka, 'Nvngbo haino taun khungbani bokhorok vngdi.' **20** Te khoroksa seleng hai hvnvi saphaika, 'Hoda, iko, nini rang; ang omono rikundri khau hui tonsokka. **21** Khaichignai borok hvnvi ang nono kirio. Niniya phano nvng nanai, nvng kaimaya phano nvng ranai.' **22** Bo bono hai hvnvi saka, 'Seleng hamya nvng! Nini kok baino ang nono khanv! Ang khaichignai, aniya phano nanai, ang kaimaya phano ranai hvnvi nvng sai mano. **23** Hake tam vngvi nvng ani rangno mohajonni nogo rviya sla? Ang kiphilvi bvsa bai ako bai manphaikamu.' **24** Bo aphuruke aro bachai tongnairogno hai hvnvi saka, 'Bini yagni a rangno nau khokchi tongnaino

rvdi.' **25** Bohrok bono hai hvnvi saka. 'Hoda, bini ba khokchino tong bla.'
26 'Ang norogno sao,' hvnvi bo bohrogno hai hvnvi saphika, 'Gvnangno teibo rvjaganv, phiya kvrvinokhe jetongma suda bini yagni najaganv. **27** Tabuk, ano bagra hvnvi gosina soiya arirogno oro tubui ani bvs kango ratharphaidi!' "

Kvplaikhe Jisu Jerusalemo habphaimani

28 Jisu omono saui bohrogni svkang svkiang Jerusalem bvkhak agog rvrvkha. **29** Thaistvi Hataini Betphage bai Bethania gana sokphai phuru **30** bo sagri khorogvino hai hvnvi sai rohorgrakha, "Bvs kangni u kamio thangdi. Norok aro sogvima logino khoroksa bai phano kasajagyakho abo tvi korai boslok masa nuguanv. Abono khengvi oro tubui phaidi. **31** 'Tam vngvi omono kheng?' hvnvi khoroksa svk svngke hai hvnvi sadi, 'Hodakra omono samung nangjago.' " **32** Rohorjagnai sagrirok aro thangvi Jisu sama haino nuguikha. **33** Bohrok a korai boslogno khengvi tong phuru, "Norok tam vngvi omono kheng?" hvnvi koraini nokphangsong bai svngjagvi bohrok hai hvnvi saphika, **34** "Hodakra omono samung nang j ago." **35** Hake a korai boslogno Jisuni thani tubui phikungo bohrogni ri phinvi a saka Jisuno kasarvka. **36** Jisu korai kasai agog phuru bororok lamao bohrogni ri boui rvlaikha. **37** Thaistvi Hataini lama tokhlai phaimani jitolo, Jerusalem gana Jisu sokphaikeno sagrirok palsa asvk wanamasingcha samungrok nugma bai tongthogjagvi khorang sotonvi Kaitorno hai hvnvi loblaikha, **38** "Porbuni mungvi phainai bagrano Kaitor bor rvthung! Chugnohani kaham vngthung, Kaitor ba chvngsacha vngthung!" **39** Aphuru luku bisingni Pharisai magnvitham Jisuno hai hvnvi sahorka, "Hoda, nini sagrirogno ta kutugdi hvndi!" **40** Jisu hai hvnvi saphika, "Ang norogno sao, bohrok kutugma thakke holongrokse chirikhokchawanv."

Jerusalemno Jisu khakamjagmani

41 Gana sokphavi bo Jerusalemno nugui kaptvtvi hai hvnvi saka, **42**

"Kahamni bagvi tamo nangvi tongkha tini phano nvng omono sai manmate! Tvmakhe abo tabuk nini mokol kotonjak! **43** Omo tvi sal nini oro phaianv, arirok nono chorsa gerebphaianv, muthubna bagvi bera dumphaianv, yang yang kasuphaianv. **44** Hake nvng bai nini oro tongnairogno bohrok gojob khvlaisuganv; holong saka holong dulsa phano bohrok narvglak, tamni hvnke Kaitor nono naikhlaina phaimano nvng sini manlvya."

Jisu noktharo habmani

45 Jisu noktharo habvi bepar thvngnairogno rvkhlaina chengkha. **46** Bo bohrogno hai hvnvi saka, "Elembagni kvrngsa svijago Kaitor hai hvnvi saka, 'Ani nok parthonani nok vngnai.' Yang norogle omono dagait bothopse svnamvi tongkha!" **47** Jisu aphuru noktharo sal brum brum phvrnggo. Ochai okrarok tei Kerong phvrngnairok bono butharna lama naituglaikha, luku bokhorokrogbo haino. **48** Tvmakhe lukurok thaicha karjagya tvi bini kok khvnai tongma bai bohrok bono bahaike butharnai buma manjagya vngvi tonglaikha.

Jisuni phanni kok svngmani

20

1 Sal sa Jisu noktharo lukuno phvrngtvtvi hamthoma pirvi tong phuru ochai okrarok, Kerong phvrngnairok tei okrachakrarok thanchake **2** bono hai hvnvi svngphaika, "Chvngno sadi, nvng tamni phan bai omorogno tang? Omorogno tangnani nono sabo phan rvkha?" **3** Jisu bohrogno hai hvnvi saphika, "Angbo kok thaicha svngnai. Norogbo sadi, **4** Johon baptisma rvmani phanle Kaitorni aroni da, borogni aroni?" **5** Hake bohrok kiching bohrok hai hvnvi salaika, " 'Kaitorni aroni' sakebo 'Norok tam vngvi hake Johonno poito khvlaiya sla?' hvnvi bo chvngno svngnai. **6** Phiya 'Borogni aroni' hvnvi sakebo, asvk bororok chvngno hadul khitarnai, tamni hvnke bohrok Johonno diari hvnvi jaikhenno poito khvlaio." **7** Abo

baino bohrok hai hvnvi saphika, "Abo buroni chvng sai manya." **8** Jisu hai hvnvi bohrogno saka, "Bu phan bai omorogno tang angbo haike norogno saya."

Angur bari samung tangnairogni rvngthoma

9 Jisu lukuno o rvngthoma saka, "Borok khoroksa angur bari svnamvi samung tangnairogni yago kvlangvi buini hao dvgvi tongvina hvnvi thangka. **10** Angurni jora phuru bini banta narvhorna hvnvi bo seleng khoroksano a tangnairogni thani rohorka. Tangnairogle yang a selengno svpraglai yak bukchakhe kiphilvi rohorka. **11** Bo hake te khoroksano rohorkua. A tangnairok bonobo lachimasingchakhe svpraglai yak bukchakhe rohorka. **12** Bo hake waithamni jora te khoroksa selengno rohorkua. Tangnairok bonobo bisogvi lengrvi bari phataro karilai rohorka. **13** Hake angur barini nokphang hai hvnvi saka, 'Tabuk ang tamo khvlainai? Ani kha jama sajlano rohoranv; bonole bohrok gvnda khvlaisoganv!' **14** Bono nukheno tangnairok hai hvnvi salaika, 'Omo nokphangni bvsalase. Phaidi, bono butharlaianv, hake angur bari chini yago kvlaianv!' **15** Abo baino bohrok bono bari phataro kariui butharlaikha. "A tangnairogno hake nokphang tamo khvlaino?" hvnvi Jisu svngka. **16** "Bo phavi a bororogno butharbavi kubimni tangnairogni yago angur bari rvanv." Lukurok o kok khvnai hai hvnyi saka, "Omo hai ta vngthung!" **17** Jisu bohrogno nasigvi hai hvnvi saka, "Hake Elembago omoni gujok tamo? 'Nok tangairok samung nangya hvnvi khibirvmani hadul, bono vngphaika ulo nok busuni hakvrak hadul.' **18** O hadulo kvlainai bo phindrik phandrak vngnai, phiya o hadul kvlaima borok bo kepegnai."

Khajna rvmani kok svngmani

19 O rvngthoma bai Jisu bohrogno kok khitarvi sao hvnvi siui Kerong phvrvngnairok bai ochai okrarok dojogojo bono romna nailaikha; tvmakhe bohrok lukuno kiri tongrakha. **20** Abo baino bohrok bvlam naitugui

tonglaikha. Borok sutrang haikha kha chanaui bini kok baino bono khvio karvi manna tvikke borok magnvitham rang bai mothorvi Jisuni thani rohorka. Hake bohrok bono ojamani yago busni bagvi romrvi rohorvi mananv. **21** A mothorjagrok Jisuno hai hvnvi saka, "Hodakra, nvng sama bai phvrngmani bebak soise hvnvi chvng sio. Keboni bumukhang nasigyai nvng Kaitorni lamani kogno soike phvrnggo. **22** Hake sadi, Romni bagra kotorno khajna rvi mano hvnvi chini Kerong saya diba?" **23** Jisu bohrogni phemlogmano sai manvi hai hvnvi saka, **24** "Rukphaini rang kaisa ano phunukphaidi. Omo saboni bumukhang? O bumung saboni?" **25** "Bagra kotorni," hvnvi bohrok sake Jisu hai hvnvi saphika, "Hake bagra kotorni manthaino bono rvdi, phiya Kaitorni manthaino Kaitorno rvdi." **26** Asvk borok bvs kango bohrok bini samao mungsa phano bvlam romvi manlvya, hake bo saphimanose wanajagvi siring siringke tongkha.

[Kvthvirok thangvi bachaphimani kok svngmani](#)

27 Saddukai magnvitham Jisuni thani phaika. (Bohrok kvthvirok thangvi bachaphiya hvnvi salainairok.) Bohrok bono hai hvnvi svngka, **28** "Hodakra, Musi chini bagvi Kerongo hai hvnvi svi kvlangkha: 'Khoroksa svk b,rsa manya sini bihikno kvlangvi thvi thangke bini boongno narvkna bagvi a randijvkno a borogni takhuk nokphirogvi nathung.' **29** Romdi, takhuk sinirok tongmani. Okra kaijagvi bvs manyaino thvika. **30** Aboni ulo te takhuksa a bvrvinok nokphirokkua, **31** phiya bini ulni te takhuksa nakhua. Abo haikemang bohrok takhuk sini a bvrvinok nau bvs manyaino thvi thangbaikha. **32** Ulokhe a bvrvibo thvika. **33** Tabuk, kvthvirok mvthangvi bacharvjagmani salo a bvrvi saboni bihik vngna kvlai? Bohrok takhuk sinino bono nokphiroglaikha!" **34** Jisu bohrogno hai hvnvi saphika, "O molni bororokse kaijaglaio kailaio. **35** Tvmakhe thangvi bachaphirvi phiya phainai molo kvthang tongvinani chukijagnairok kaijaglaiya kailaiya. **36** Bohrok thvi manya, bohrok suarirok hai; phiya thangvi bachaphika hvnvi bohrok Kaitorni bvs. **37** Kvthvirok mvthangvi bacharyjagmano Musi suda thaske phunuglangkha. Elembago hor bochobni kok svijak jitolo bo Porbuno 'Abrahamni, Isakni tei Jakobni Kaitor' hvnvi salangkha.

38 Hvmba bo kvthangni Kaitor, kvthviniya - bebagno bini thani kvthang."

39 Kerong phvrngnairok magnvitham hai hvnvi sachaka, "Hodakra, nvng kahamno saphika." **40** Tamni hvnke Saddukairok Jisuno tei svngphina phano svngraglvya.

Masiani kok svngmani

41 Jisu bohrogno hai hvnvi saka, "Masia Daudni bvsa hvnvi bororok bahaike salaibai? **42** Tamni hvnke Lobmungo Daud sakphangno hai hvnvi salangka, 'Porbu ani Porbuno hai hvnvi saka: Achugdi oro ani yagra bvkhak, **43** khvlaiya sak ang nini arirogno yakung yaphangni yakung bogjagnai." **44** Daudse bono 'Porbu' hvnvi hvnke bahaike Masia bini bvsa vngvi mannai?"

Kerong phvrngnairogno Jisuni ragdama

45 Bebak borogno khvnai tong phuru Jisu bini sagrirogno hai hvnvi saka, **46** "Kerong phvrngnairok bai huske tongdi. Bohrok lilinglala kanna khatungo; hatihabao khulumjagnani, kuthumnok bai pandao kuchugo achugna naio. **47** Bohrok randijvkrogno nokhuk monogbavi saka simi parthona kologmakhe khvlai phunugo. Bohrok jerao bejai satogjagnai."

Randijvkni yapharmuog

21

1 Jisu naharvi nai ba gvnangrok noktharni rang tongjagnai kotrao bohrogno yapharmung rvi tonglaio. **2** Belai bigra randijvk masano lebni rvi tongmabo bo nuhuka. **3** Hake Jisu hai hvnvi saka, "Ang norogno soino sao, o randijvkse bebagni sai rvkukha. **4** Buile kvbangmanise mukhi svk khaiklairvo; o randijvkle kvrvitvtvi chana ajimanose bebak rvbaikha."

Nokthar gojob vnganv hvnvi Jisu samani

5 Bvsvk holong milik milik tei Kaitorno yapharjagmani manvi naithogrok bai o nokthar chitijakha hvnvi borok magnvitham salai tonglaimani. Hake Jisu hai hvnvi saka, **6** "Tabuk asvk manvirok norok nugmano - omo tvi sal phaianv, holong saka holong tonglak, joto svbai khibijaganv."

Mol paima svkang vngnanirok

7 Bohrok hai hvnvi svngka, "Hodakra, buphuru omo vngnai? Vngna phuru bubo tvi soidom phunugjagranai?" **8** Jisu hai hvnvi saka, "Huske tongdi, ta kororvjagdi. Baksa ani mungvi hai hvnvi saphaianv 'Angno bo!' ebakhe 'Mol sokphaika!' Bohrogno ta rvkthardi. **9** Norok choba bai urumuruni kok khvna phano ta kiridi; abohrok ma vngranaino, tvmakhe asvk baino o mol paiyakho." **10** Bo hai hvnvi sai tongkha, "Dophani bebailo dopha, hani bebailo ha choba bachawanv; **11** koromsai phaianv bangla, kvrvngsa kvrvngsao vnganv chacharara, sibany boiar kvthung; kirimasingcha vngmung vnganv, phiya nokhao toriham nugjaganv. **12** Omorok vngya sini norok khajaganv, satogjaganv; norok kuthumnogo busni bagvi tvlangjaganv phiya jelo dajaganv; ani hokete bagra bai ojararogni thani norok tubujaganv. **13** Hake ani kok sanani norok juit mananv. **14** Bus thumjak phuru tamo sana nangno abono svkang baira wanaya hvnvi bvkhano thiti khvlaidi. **15** Norogni bukhugo angno omo tvi kok elemi rvphaianv norogni bebak bebail bororok abono kasau tei svbai manglak. **16** Norogni mapha, takhuk, sandai tei bayabrok bai suda norok yapharvi rohorjaganv; norogni bisingo baksa butharjaganv. **17** Ani bagvi norogno bebagno naisleanv, **18** tvmakhe norogni bvkhvnai tvngsa phano kusta vnglak. **19** Asvkrogno monogma bising tvino norok soini langma mananv."

Jerusalem gojob vnganv hvnvi Jisu samani

20 "Jerusalemno sengkvrak bai sengkvrakhe chorsa gerebsajak nuk phuru bini gojob vngna sampaka hvnvi norok sai mananv. **21** Aphuru Judiao tongnairok hatai bvkhak kharvi thangtung; o tauno tongnairok phataro ongkhortung; phataro tongnairok bisingo ta haptung. **22** Tamni hvnke abo

'Yagul Sumani Sal'; a salono Elembago svijagrok bebak nangphainai. **23** A salo sagderia tei sagvnangmarogni bvsvkse birman vngjano! Bejai digisigi sal o hao phaianv, o dophani saka Kaitorni jolima ongkhoranv. **24** Bohrok seng bai tanvi butharjaganv, bebak hao bohrok khai tvlangjaganv, phiya Judaiyarogni mol paiya sak Jerusalem bohrok bai kaduljaganv."

Borogni Sajla pbainani

25 "Sal, tal tei athukirini bisingo soidom phunugjaganv. Haktoro bebak dopha bejaikhe kha koromsajaganv, tvirang tvi bvlab kutuksaiphaima bai borogni bvka kvlvi sawanv. **26** Bvskango haktor gvnangvi phaina hvnmano wanau nasingtvvtvino bororok kirima bai phola bomjaglak, tamni hvnke nokhani bebak phan gurumsawanv. **27** Aphuruno Borogni Sajla chumuiokhe belai phan kvrak tei chvngsacha bai nugjakphaianv. **28** Omorok vngna chengsakeno norok bokhorok tisai bachadi, tamni hvnke norogni yogna sampaka."

Khvichang buphang bai phvrvngmani

29 Hake Jisu bohrogno o rvngthoma saka, "Khvichang buphangno ebakhe kubun buphangrogno nahadi. **30** Bohrogno bvlai rotomma nukhe tangbla sampaka hvnvi norok sai mano. **31** Omo haikeno norok omo tvirok vngma nukhe aphuru Kaitorni ha sampaka hvnvi kha kadi. **32** "Ang norogno soino sao, tabukni bebak bororok thvibaiya sini o vngmungrok vnganv. **33** Nokha bai haktorse kvmawanv ba ani kok kvmaglak."

Huske tongthai

34 "Chananvngna, chuakmaikham, svngcharini wanamawansukma norogno kobolvi manya tvi norok huske tongdi. Vngyakhe norogni thani a sal achomsa phano phaina tongo. **35** Tamni hvnke haktoro tongnairok bebagni thani a sal choka hai chagjagvi phaianv. **36** Phainai vngmungrogno monogvi manna tvikhe, hake Borogni Sajlani bvskango bachai manna tvikhe huske tongvi parthona khvlaisogdi." **37** Abo haikhe

Jisu sal salo noktharo phvrngo, hor horoke Thaistvi Hataio thangvi tongvio. **38** Bebak borok bini kok khvnana bagvi aichukni simino noktharo thangvi tongvilaio.

Jisuno butharna cblaimani

22

1 Awang Kvranni Sal sampai phaika, abono Yogma Ter hvno. **2** Ochai okrarok tei Kerong phvrngnairok lukuno kirima bai Jisuno butharna lama naitugui tonglaikha. **3** Hake Judani (bono Iskariotbo hvno) bisingo Soitan habphaika; sagri chignvini bisingo bo khoroksa. **4** Abo baino bo ochai okrarok tei noktharni sebuk okrarok bai Jisuno bohrogni yago bahaikhe yapharvi rohomai hvnvi thangvi salaika. **5** Bohrok tongthogjagvi Judano rang rvna hvnlaika. **6** Judabo gosika, hake bororok sai manya tvikhe Jisuno yapharvi rohorna bagvi seb naitugui tongkha.

Yogma Tero pandani luajoma

7 Awang Kvranni Ter bisingono dopha yogmano muitukhe mera bvsa ratharna sal sokphaika. **8** Jisu Pitor bai Johonno hai hvnvi sai rohorka, "Thangdi, chini bagvi Yogma Terni pandani luajoma khvlaidi." **9** Bohrok hai hvnvi svngka, "Chvngno buro khvlaidi hvnvi nvng hvn?" **10** Bo hai hvnvi saka, "Khvnadi! Tauno hapkeno borok khoroksano gola bai tvi tvlangma nuganv. Bo bai thangvi bo habmani nogo habiyidi. **11** Hake nokphangno hai hvnvi svngvidi, 'Hodakra bini sagrirok bai bu khotolo Yogma Terni panda kvlainai hvnvi nono svngrvhoru.' **12** Bo norogno sakani chiti jak khotol kotor kaisa phunuguanv. Arono bebak khvlaisogdi." **13** Bohrok thangvi Jisu sai rohorma haino bebak nugui aro Yogma Terni pandani luajoma khvlaika.

Porbuni panda

14 Mol sokphaikeno Jisu chonghorrok bai baksake chana achukha. **15**

Hake bo bohrogno hai hvnvi saka. "Ang satogjagma svkang norok bai o Yogma Terni panda khvlaina belai muchungo. **16** Tamni hvnke ang norogno sao, Kaitorni hao aboni gujok svbaijagya sak ang o chamung tei chaglak." **17** Hake Jisu khuri nau Kaitorno doinobad rvi hai hvnvi saka, "Hi, nadi, norok omono thigvi nvnglaidi. **18** Ang norogno sao, Kaitorni ha phaiya sak ang tabukni simi tei angur bvtvi nvnglak." **19** Bo hake awang nau Kaitorno doinabad rvi abono svkagvi bohrogno hai hvnvi sai rvkha, "Omo ani bvsak, norogni bagvi omo rvjakha. Ano muitukhe omo hai khvlaidi." **20** Chalaibaikhe bo abo haikeno bohrogno hai hvnvi saui a khurino rvkha, "O khuri norogni bagvi kochogjak ani thvi bai mari bujak Kaitorni joban kvta. **21** "Naidi, ano romrvi rohorna oro ang bai baksano chalaithani achugjak! **22** Kaitor tholma haino Borogni Sajla thvianv, tvmakhe bono romrvi rohorna bo hama sitranai!" **23** Bohrogno bisingo sabo o samung tangthotok hvnvi sagrirok aphuruke bohrok kiching bohrok salaina chenglaikha.

Sagrirogni bere sabo torkuk

24 Sagrirogni bere sabo torkuk hvnvi bohrogno bisingo tokra vngvi tonglaikha. **25** Hake Jisu bohrogno hai hvnvi saka, "O svngcharni bagrarok borogni saka taudari khvlaio, phiya borogni saka haugari khvlainairok 'Samung kaham tangnai' hvnjago. **26** Tvmakhe norok abo hai vngthai kvlaiya. Norogni bere kotor bo kotoi vngthai kvlaio, phiya norogni bere bokhorok bo seleng hai vngthai kvlaio. **27** Hake chana hvnvi achugnai da torkuk, mamui bognai seleng da torkuk - sabo torkuk? Achugnai bono torkukna! Phiya angle norogni seleng haikese tongjao. **28** "Ang satogjagvi amjogjagma salo norok ang baimang tongkha. **29** Apha ano taudari khvlaina rvma tvi angbo norogno haikeno rvo. **30** Ani hao norok ang bai baksa chana achuganv, phiya alongo achugui Israilni dopha chignvino bus thumanv."

Pitor gosiglak hvnvi Jisu samani

31 "Simon! Simon! Khvnadi! Gisti mai chogvi svkagma hai norogno chognani bagvr Soitanno bervi rvjakha. **32** Tvmakhe nini poito thiti tongna tvi ang parthona khvlaika. Nvng kiphil phuru nini takhukrogno kvrak khvlaiphaidi." **33** Pitor hai hvnvi saphika, "Porbu, ang nvng bai baksa jelo thangna phiya thvina suda tiar tongo!" **34** Jisu hai hvnvi saphika, "Pitor, ang nono sao, tini tokla kokchigya sini nvng ano siniya hvnvi waitham gosianv."

Tiar vngdi

35 Hake Jisu bohrogno hai hvnvi saka, "U waisa ang norogno rang buya, bogol buya, tei yaklab buyakhe kvrvngsao rohor phuru norok mungsani phano bialkhe da rna tongkha?" Bohrok "Mungsani phanoya," hvnvi saphika. **36** Jisu hai hvnvi saka, "Tabukle rang tongkhe ba tvina nangany, bogol tongkhebo haino. Seng kvrvikhe bo kamchlvi phalvi phano paina nangany. **37** Ang norogno sao, 'Majra gvnangrogno bere bo khoroksa khobjagnai,' hvnvi Elembago svijagmani o kok ani sago nase nangphainai; tamni hvnke ani bagvi svijagmani nangphai tongkha." **38** Sagrirok hai hvnvi saka, "Nahadi, Porbu! Oro seng kongnvi. tongo." "Tei nanglak," hvnvi bo saphika.

Thaistvi Hataio Jisuni parthona

39 Jisu aroni ongkhorvi sal brum brumni loi Thaistvi Hataio thangka; sagrirogbo bini logi thangka. **40** Aro sokphavi Jisu bohrogno hai hvnvi saka, "Belogmao kvlaiya tvi parthona khvlaidi." **41** Hake bo bohrok bai kagvi chalthayao thangvi yaksu sungvi hai hvnvi parthona khvlaika, **42** "Apha, nvng muchungkhe o khurino ani oroni norvi tvlangdi; mobo ani muchung tviya, nini muchung tvino vngthung." **43** Chugnohani suari khoroksa bini thani nugjagvi bono phan rvi kvlangkha. **44** Kha koromsarvi Jisu teibo kaichomvi parthona khvlai tongkha; aphuru kolomtvi bvthai thvi haike hao kvlaikha. **45** Parthona khvlaibavi bo bachai sagrirogno thani kiphilvi bohrok khakamjagvi muktrvi thangvi tongmano nukphaika. **46**

Hake bo bohrogno hai hvnvi saka, "Tam vngvi norok muktrvi thangvi tong? Belogmao kvlaiya tvi bachai parthona khvlaidi."

Jisu romjagmani

47 Bo kok saise tongkho aphuru Juda hvnvi sagri chignvini khoroksa borok kvbangma tubui aro sokphaika. Bo Jisuno motom suna hvnvi gana phaika. **48** Hake Jisu bono hai hvnvi saka, "Juda, motom suma haikese nvng Borogni Sajlano arirogni yago yapharvi rohorchio?" **49** Tamo vngna naikha sai manvi Jisuni logisongrok hai hvnvi svngka, "Chvng seng tisachina da, Porbu?" **50** Bohrogni bere khoroksale ochai okrani selengno kosonvise rvgrakha, bo a selengni yagrani khunju rai khibika. **51** Hake Jisu hai hvnvi saphika, "Belaise vngkha, ta khvlaichidi!" Bo a borogni khunjuno tangvi hamrvphika. **52** Ochai okra, noktharni sebuk okra tei okrachakra bono romna phainairogno Jisu hai hvnvi saka, "Ang ba dagait da, daingrok sengrok baikhe norok phai ba?" **53** Ang asvk sal brum brum noktharo norok baimangse, norok aphuru ano yak tisaya. Tabukle norogni amal phaika, andarni phannibo amal."

Pitor Jisuno gosiya vngmani

54 Bohrok Jisuno romvi ochai bokhorogni nogo tvlanglaikha. Pitor hachalo tongtvtvi rvktharka. **55** Nokhla kvcharo baksa hor mvsvngvi achugui tonglaikha. Pitorbo bohrogni bisingo achuguikha. **56** Hor gana bono achugui tongma nugui selengjvk khoroksa bono nasigvi hai hvnvi saka, "O borogbo bini loginino!" **57** Pitor abono gosiyai hai hvnvi saka, "Bvrvima, ang bono sise siniya!" **58** Kisa tongvi borok khoroksa bono nugui hai hvnvi saka, "Nvngbo bohrogni bere khoroksa!" Pitor hai hvnvi saphika, "Chvlasa, angya!" **59** Svrapsa tongvi te khoroksa bono sotonvi dabogvi hai hvnvi saka, "Omo soino bini logino borogno, bobo Galilini borok!" **60** Pitor hai hvnvi saphika, "Chvlasa, nvng tamo sa ang romvi manya!" Bini kok paislabvi manlvya, haikeno tokla kokchigvi rvlaha. **61** Porbu bumukhang kiphilvi Pitorno dadadidik nahaka. Hake Porbu hai

hvnvi samanino Pitor maitu manjakha, "Tini tokla kokchigya sini nvng ano siniya hvnvi waitham gosianv." **62** Pitor phataro thangvi muisubuk chauvi kabvi tongvikha.

Jisu chengdula thvngjagvi bujagmani

63 Jisuni mvrvgnairok bono chengdula thvngvi bulaikha. **64** Bohrok bini mokol khapungvi bono butvtvi hai hvnvi svngka, "O diaris, nono sabo bu sadi!" **65** Abo haike bohrok bono teibo kvbangma lachimasingchakhe kulkha.

Kaunsil bvskango Jisu

66 Aikheno Judairogni okrachakra, ochai okra tei Kerong phvrvgnairok kuthumlaika. Hake Jisu Kaunsil bvskango tubujakha. **67** "Chvngno sadi," hvnvi bohrok Jisuno hai hvnvi svngka, "Nvng Masia da?" Bo hai hvnvi saphika, "Ang sa phano norok poito thanglak. **68** Phiya ang norogno mungsa svk svng phano norok saphiglak. **69** Tvmakhe tabukni simi Borogno Sajla Kvplaisa Kaitorni yagra bvkhak achugui tonganv." **70** Bohrok bebagno bono hai hvnvi svngka, "Hake nvng da Kaitorni Sajla?" Jisu bohrogno hai hvnvi saphika, "Angno bo hvnvi norogno sai tongkha bla." **71** Hake bohrok hai hvnvi salaika, "Chini tei sakki samung kvrvikha. Chvng sakphangno birri khukni kok khvnaka."

Pilatni bvskango Jisu

23

1 Asvk borok aphuruke rupsa bachalavi Jisuno Pilatni bvskango tubui phailaika. **2** Aro bohrok hai hvnvi bono majra berna chenglaikha, "Chvng nukha o borok bebak dophano lama kororvi tongkha, hake Romni bagranobo khajna ta rvdi hvnvi kebengo. Bo sagno Khristo, bagra hvnvi gosio." **3** Pilat bono hai hvnvi svngka, "Nvng Judairogni bagra da?" "Nvngno sai tongkha bla," hvnvi Jisu saphika. **4** Hake Pilat ochai okrarok

tei lukuno hai hvnvi saka, "O borogno majra bernani ang mungsa phano bvlam nugya." **5** Bohrok teibo sotonvi hai hvnvi saka, "Bini phvrvngma bai bo Judia gvnangvi bebak borogno guar svnamvi tongo. Galilio chengsamani tabukhe oro sokphaika."

Herodni bvsjango Jisu

6 Abono khvnai Pilat hai hvnvi svngka, "Omo Galilini borok da?" **7** Bo Jisuno Herodni angkorni borok hvnvi sai manvi bini thani rohorka. Herodbo Jerusalemo tongmani jora. **8** Jisuno nugui Herod belai tongthogjakha, tamni hvnke bini kok khvnai Herod bumasingni simi Jisu bai malaina hvnvi tongmanino. Bo bini wanamasingcha samung nainani belai muchungjagvi tongmanino. **9** Abo baino Herod bono kok kvbangma svngka, tvmakhe Jisu thaicha phano salvia. **10** Ochai okra tei Kerong phvrvngnairok jabirvi bachai teibo kvrakhe bono majra berlaikha. **11** Herod bini sengkvrakrok bai Jisuno hanang pinangkhe chengdula thvngvi ri jilijalak kanrvi Pilatni thani kiphilvi rohorphika. **12** A salono Herod bai Pilat yar khalaichatikha; agile nasigvise manlaiya.

Jisuno butharna dagimani

13 Hake Pilat ochai okrarok, hodarok tei lukuno thanchake ringkha. **14** Bo bohrogno hai hvnvi saka, "Bororogno lama kororvi tongkha hvnvi norok o borogno ani thani tubui rvphaika. Naidi, norogni bvs kangono ang bono potali svngphenegvi naikha; norok majra berma hai angle bini mungsa phano majra nugya. **15** Herodbo haino bini majra nugya, abo baino chini thani kiphilvi rohorka. Bo mungsa phano butharjagnai samung tangya. **16** Hake ang bono kisa svk kosonvi yakarvi rohoranv." **17** Bisi brum brum khoroksake Yogma Tero Pilat khajagno phiyogvi ma rohoro. **18** Bebak borok hai hvnvi chirikhogvi saka, "Pai khibidi bono! Barabbano phiyogrvidi!" **19** (Barabba a tauno bulai toglaikhe phiya borok butharvi jelo chobjagmani.) **20** Pilatkhe Jisuno phiyogna naio. Abo baino bo lukuno te waisa sotonvi sai naikha. **21** Tvmakhe bohrok hai hvnvi chirikhokphika,

"Kuruso kanta budi! Kuruso kanta budi bono!" **22** Pilat hai hvnvi mobaikhe waitham saka, "Tam vngvi? Bo tamo majra khvlaika ba? Bo butharjagna nangnai abo tvi majra ang bini nugya! Hake ang bono kisa svk kosonvi yakarvi rohoranv." **23** Tvmakhe bohrok Jisuno kuruso kanta budi hvnvi sotonvi chirikhokphlai tonglaikha. Ulo bohrok chirikhogmano nangkha. **24** Bohrok naima haino Pilat dagikha. **25** Bulai toglaikhe phiya borok butharo hvnvi jelo chobvi tongjagnaino, bohrok naima borogno bo phiyogvi rvkha. Jisunokhe bohrogni muchung tvi khvlaithung hvnvi bohrogni yago yapharvi rvkha.

Jisu kuruso kanta bujagmani

26 Bohrok Jisuno tvlangvi thang phuru Kurinini Simon hvnvi borok khoroksano nukha. A borok kami bvkhakni tauno phaimani. Bohrok bono romphre Jisuni uklog kurus balrvna hvnvi bini gvdnao boksai rvkha. **27** Luku kvbangma bini uklog himlaijak; aboni bisingo bvrvirok baksa tongo. Bohrok bini bagvi muisubuk chauai kablaijak. **28** Jisu bohrogni phasing uphilvi hai hvnvi saka, "Jerusalemni bvrvimasong! Ani bagvi ta kabdi; norogni sagni bagvi tei norogni bvsarogni bagvise kabdi. **29** Tamni hvnke omo tvi sal phaianv, 'Banjirogno hamchanai, ogo bvsa tviya rognno phiya bvsa abuk ma charvyarogno hamchanai,' hvnvi bororok sawanv. **30** Aphuru borok hatairogno 'Chini saka kvlaiphaidi!' haplokrogno 'Chvngno kholobphaidi!' hvnvi sawanv. **31** Buphang kvthangnose hai khvlaike, kvthvino bahai jani khvlaino?" **32** Bohrok tei khorognvinobo Jisu bai baksa butharna bagvi tvlangkha; a borok khorognvino majra gvnang. **33** "Bokhorok Chara" hvnvi kvrvngsao sokphaikhe bohrok Jisuno aro kuruso kanta bukha, a majra gvnang khorognvinobo haino khvlaika, khoroksano bini yagra bvkhak te khoroksano yaksi. **34** Aphuru Jisu hai hvnvi saka, "Apha, bohrogno nakardi! Bohrok tamo khvlai tongkha, bohrogno sai manya." Bohrok amjogvi bini rino bantakhe nalaikha. **35** Lukurok aro bachai nai tongkha. Judaini hodarok bono lengavi hai hvnvi saka, "O borok buinole mvthangvi mano; bo Kaitorni chongjak Masia hvnke sagno mvthangtung!" **36** Sengkvrakrogbo bono lengailaikha. Bohrok bono

angurni arak hadilai hai hvnvi saphaika, **37** "Nvng Judairogni bagrakhe sagno mvthangdi!" **38** Bini bokhorok sakao hai hvnvi o kok svijak, "Omo Judairogni bagra." **39** Aro khachigjagnai majra gvnang khorognvini bere khoroksa bono hai hvnvi hvnka, "Nvng ba Khristo hvn bla? Hake nvng sagno mvthangvi chvngnobo mvthangdi." **40** Tvmakhe te khoroksa bono damorogvi hai hvnvi saka, "Nvng Kaitorno kiriya da? Chvngno bebagno dalsake butharna dagijak. **41** Chinile soino, chvng khvlaima haino katsvi manjagvi tongo. Bole mungsa phano majra khvlaiya." **42** Hake bo Jisuno hai hvnvi saka, "Jisu, bagra vngvi phai phuru ano ta pogjabadi!" **43** Jisu bono hai hvnvi saka, "Ang nono soino sao, tinino nvng ang bai Khakchang Hao tongvianv."

Jisu thvimani

44 Salni chignvi phuru sal bini chvngmung chvnglvya. Hake sarikni kvtham jora ha gvnangvi andar vngkha. **45** Noktharni ripor svngjak khagnvi vngvi khichigvi thangka. **46** Hake Jisu sotonvi chirikhogvi hai hvnvi saka, "Apha, nini yago ani phola yapharo!" O kogbo sabaika, hamabo laikha. **47** Sengkvrak okra abono nugui Kaitorno lobvi hai hvnvi saka, "Omo soino borok kaham!" **48** O vngmungno naina hvnvi aro kuthumnai lukurok abono nugui bebagno khaklab bu buise nogo kiphilbaisio. **49** Galilini simi Jisuni logi phainai bvrvirok bai bono sininai bebak bororok hachalo bachatvtvi bebak nai tonglaikha.

Jisuno phobman

50-51 Josep hvnvi borok khoroksa tongo, bo Judiani Arimathia taunni phaimani. Bo borok kaham tei sutrangbo; Kaitorni ha phainanino bo nasingvi tongo. Kaunsilni chalai phano bohrogni sanjlaimano tei khvlaina hvmano bo gosiya. **52** Bo Pilatni bvsakango thangvi Jisuni bvsak kvthvino sanvika. **53** Bo abono tikhlai jorini ri bai dulkha; holongdabni khurmani mangkhoru bo abono tonvikha. A mangkhoru masa phano phobjagyakho. **54** A salo Sukurbar, Sabbath rakhognani luajoma khvlaina sal. Aphuru

Sabbat vngtvi vngtvi. **55** Galilini simi Jisuni logi phainai bvrvirok Josepni uklog uklog thangvi mangkhor naikha. Jisuni bvsak kvthvino bahaikhe tonjakha abobo bohrok naibukha. **56** Bohrok nogo kiphilvi thangvi langi thok motom tei methi motom svnamvilaikha. Kerong rvksaui bohrok Sabbat salo samung tangma bathaglaikha.

Jisu thangvi bachaphimani

24

1 Roibarni phungo katsvi asirisiri a bvrvirok bohrok svnammani langi thok motom tvlangvi mangkhor thanglaikha. **2** Bohrok thangvi nugui ba mangkhor duglamni holongdap goirogrvi konorvjak. **3** Hake bohrok bisingo habvi thangka; tvmakhe bohrok Jisuni bvsak kvthvino nuguilvya. **4** Bohrok mvlang chai aro bachai tonglaigrakha, aphuru achomsa ri chvngsachake kanjak borok khorogni bohrogni thani bachaphaika. **5** Kirima habjagvi a bvrvirok hao naikhlai bomlaikha. Hake a bororok hai hvnvi bohrognobosaka, "Borok kvthangno ba norok tam vngvi kvthvirogni bisingo naitugui tonglaikha ba? **6** Bo oro kvrvikha, bo thangvi bachaphika. Galilio tong phuru bo o kok samano muitu khvlaidi, **7** 'Chengtarogni yago Borogni Sajla yapharjagvi kuruso kanta bujagna nangnai, phiya sal thamni salo thangvi bachaphina nangnai.' " **8** A bvrvirok hake o kogno muitu manjakha. **9** Mangkhorni kiphilvi thangvi o vngmarogno sagri chisarogno saika, teirognobosaike. **10** A bvrvirok vngkha Mariam Magdalini, Johanna tei Jakobhi buma Mariam. Bohrok bai tei bvrvirok omorogno chonghorogno salaikha. **11** Chonghorrok tvmakhe bohrok saphaimano chengra hvnvi tonglaikha, abo baino bohrok poito vnglvya. **12** Tvmakhe Pitor bachai mangkhor bvkhak khachigvi bisingo kongvi naha ba richum simise nugo, tei mungsa phano kvrvvi. O vngmano nugui bo wanajagvi nogo kiphilka.

Emmau lamao Jisu nugjagmani

13 A salono sagrirogni bere khorognvi Emmau hvnvi kami bvkhak thanglaimani. Abo Jerusalem bai mail kaisini chalo. **14** Asvk vngmarogno bohrok salai thanglaio. **15** Bohrok abohrogno salai tong phuru Jisu sakphang gana phavi bohrok bai baksa himvi tongkha. **16** Bohrok bono nugmale nukha, mokol philjak tongma bai sini manlvya. **17** Jisu bohrogno hai hvnvi saka, "Norok himvtvtvi tamo salai?" Mvkhang svrangjagyakhe bohrok bathaglaikha. **18** Bohrogni bere Kvliopa hvnvi khoroksa bono hai hvnvi hvnka, "O sal nvithamni bisingo Jerusalemo asvk vngthangmarogno aro phainairogni bere nvng simise sai manya bla?" **19** "Tamo vngkha ba?" hvnvi bo svngka. Bohrok hai hvnvi saphika, "Nasaretni Jisuno twi vngmarok. Bo diarise, Kaitor bai lukurogni bvs-kango sathanibo tangthanibo bo kvplai haikhe khvlaio. **20** Chini ochai okra tei hodarok bono butharna dagirvna hvnvi romrvi rohoroka, hake bono kuruso kanta bui butharka. **21** Bono Israilrogno phiyognai hvnvi chvngbo khatung khajake tongmani. Hai phano omorok vngmani tini bai sal tham vngkha. **22** Aboni berese chini magnvitham bvrvirok chvngno wanarvi rvphaika. Bohrok phungo asirisiri mangkhoru thangmani; **23** tvmakhe bohrok bini bvsak kvthvino nuguilvya. Suarirok bohrogno nugjagmanino bohrok kiphilvi phai saphaika. Jisu thangchaphika hvnvi a suarirok bohrogno sai kvlangkha. **24** Chini bere magnvitham katsvi bvrvirok saphaima haino mangkhoru nuguikha; tvmakhe bohrok bono nuglvya." **25** Hake Jisu bohrogno hai hvnvi saka, "Tamsvk asvk norok mosok gvja! Diarirok sai kvlangmani bebagno poito khvlaimani norok tamsvk asvk dudru mudru vnglai! **26** Chyhgsacha vngma svkang Masia satogjagna ma nangthai kvlaiya diba ?" **27** Hake Musi tei bebak diarirogni simi bono twi Elembagni bebago asvk sai kvlangmarogno Jisu bohrogno phiklai phiskake sai khvnarvkha. **28** Thangna hvnvi phaimani kami gana bohrok sokphaika. Jisu aphuru teksa hachalo thangna naima haikhe phunukka. **29** Tvmakhe bohrok bono dabogvi hai hvnvi saka, "Sal thangka, sanja dabokha; nvng tini chvng bai tongsidi." Hake bo bohrok bai tongna hvnvi thangka. **30** Jisu bohrok bai chana achugui ruti nakha, parthona khvlai abono svkagvi bohrogno bantakhe rvkha. **31** Mokol kiyogvi Jisuno bohrok sinika, haikeno Jisu bohrogni bvs-kangni kvmaui thangka. **32** Bohrok kiching bohrok hai hvnvi

salaika, "Lamao bo chvng bai salaitvtvi Elembagni kogno sukrubui sa phuru chini bvka maitvk kutugma hai kutugya da?" **33** Bohrok aphuruno bachau Jerusalemo kiphilvi thangphika. Bohrok aro nuguikha sagri chisarogno teirok bai baksa kuthumvi hai hvnvi salai tonglaio, **34** "Porbu soino thangvi bachaphika! Simonni thani bo nugjakha." **35** A khorognvirok lamao vngmano tei ruti svkak phuru bahaike bohrok Porbuno sinika bohrogno sukrubui saka.

Sagrirogni thani Jisu nngjagmani

36 Bohrok omono sai tong phuru Porbu sakphangno bohrogni bisingo achomsa nugjagvi hai hvnvi saphaika, "Norok hamdi." **37** Bohrok kirima habvi sunduruma chai burasa baise malaisi bla hvnvi tonglaikha. **38** Tvmakhe Jisu bohrogno hai hvnvi saka, "Norok tamni asvk amang chimang vng? Tamni asvk norogni bvka dudru mudru ? **39** Ani yakung yak naidi omo ang sakphangno. Ano tangvi naidi ma tanganv, burasa hvnke norok ano bahan bekereng gvnang nugma hai vnglak." **40** Bo omono saui bini yakung yak phunukka. **41** Bohrok belai tongthogjakha, wanajakha; aphuru phano bohrok bono poito vngvi manyakho. Abo baino Jisu bohrogno hai hvnvi svngka, "Norogni oro chajagnai mungsa svk da tong?" **42** Bohrok bono a serjak phoncha rvka. **43** Jisu abono nau bohrogni mokol bvs kangono chakha. **44** Hake bo bohrogno hai hvnvi saka, "O vngmarogno norok bai tong phuru ang samani - ano twi Musini Kerongo, diarirogni svimao tei Lobmungo svijagmani jotono soike nangphaina nanganyv." **45** Elembak kha habna bagvi Jisu aphuru bohrogni bvka kiyogrvi **46** hai hvnvi saka, "Omo hai svijak tongo - Masia satogjagna nangnai, phiya sal thamni salo thangvi bachaphina nangnai. **47** Hake bini mungvi bebak dophani thani kha kiphilnani bai sumsok nakarma kok Jerusalemi simi pirjagna nangnai. **48** Norogno omorogni sagbaithang nugnairok. **49** Apha rvna hvnvi svmai khvlaimano angno norogno rohoranyv. Abo baino kuchukni bor norogni thani phaiya sak norok o tauno nasingvi tongradi."

Jisu chugnohao kasarvi tvlangjagmani

50 Aboni ulo Jisu bohrogno taunni phataro Bethania jora tubukha; aro yak tisau bo bohrogno bor rvkha. **51** Bor rvtvtvi bo bohrok bai kagvi chugnohao kasarvi tvlangjakha. **52** Bohrok bono khulurnka, kha kuplung tongthokke Jerusalemo kiphilvi phaika. **53** Hake bohrok noktharo Kaitorno lobvimang tonglaikha.